


特別  
ル 5  
1570  
16









特  
1570  
卷 16



寧波府志卷四十四 傳十六

南京兵部尚書郡人張時徹纂修  
寧波府知府蜀威遠周希哲訂正

列女

宋葉氏父家慈溪歸鄞邑史簡年二十五而寡四  
壁蕭然惟遺弱子幼女未幾子又夭日夜抱幼女  
泣而籲天遺腹舉一男毅然不可奪志惡衣菲食  
足不踰閭教女組績課子讀書人不堪其憂而處  
之晏如也逮子長從鄉先生游每戒以師慕古昔



敦尚行義匪徒操筆爲文也其子愈自刻勵遂以問學德業稱于時後產浸饒衍而益崇儉約待妯娌和而有禮御僕妾嚴而有恩調人之急無吝鞠養遺女凡數人使各得所歸年八十六卒子名詔字升之以八行舉于朝不就後累世貴顯凡十八封至冀國夫人

張氏奉化李綦之妻名妙靜慈溪人年十九歸李氏夫先疾病張甫入門一顧而絕或謂伉儷未成盍返從父母張誓曰入李氏之門即李氏婦遂守

節終身年八十四而卒墓在江口人稱爲女兒太

婆墳

王氏奉化人年十九歸廣平舒立三月而夫亡後媒妁踵至王氏答曰雖父母有命我志不可奪也有田僅數畝守節終身壽八十八卒叅政樓鑰立石塚上題曰宋節婦王氏之墓

戴氏奉化剡源戴某女年二十適陳自強不一年而夫亡父母欲奪其志誓不可端靜貞淑內外肅如宗族鄉黨咸敬慕之年八十而卒名曰清臺節



婦

王氏奉化人歸董軫未成婚而軫亡或勸改圖王氏誓不許其姒有娠指而言曰吾得姒一男足以興董氏未幾果得男以爲嗣長名之邵後以義舉入仕紹興間使三韓轉修武郎乞以恩例侍養後封爲孺人

范氏奉化人年二十一歸江文鑄及門未合鬢鑄忽癩疾卒范曰旣入門即江氏婦也遂居江氏撫諸姪如已子年九十五卒

元蔡氏鄞人初在室聽諸弟讀小學書至女子十年不出問曰女子之道止是乎父奇其言因教之孝慈節義及古列女事乃喜曰斯可以爲人矣父益奇之旣長爲擇配歸黃天驥逾年而天驥卒蔡時年十九生子傳孫甫三月明年其舅亦卒蔡啣恤茹荼以死自誓屏華采服艱勤盡賣其奩具以營田廬奉姑保孤三十餘年猶一日傳孫奉母教能自樹立顯名得察舉補儒學官蔡氏名因之亦著至順三年有司上其事旌其門曰孝節



寧波府志卷四十一  
三  
月又一  
何氏鄞人歸盧秀卿至正間任管界司巡檢嬰疾而亡何氏時年二十五執喪三年哀毀欲絕奉姑守節五十六年如一日志行卓異慶元路總管上其事表曰孝義之門

張氏鄞人歸應仕鵬方十八歲而夫亡遺腹生子應槐張氏矢志自守孝養舅姑教子其子讀書業儒有成後任儒學官有司上其事于朝旌爲節孝之門時慶元路總管王德謙爲書扁以歸之至今猶存

元王氏名守貞鄞人年十八歸胡志學越二載夫亡時年方二十父母舅姑憐其少無子而寡將奪其志王氏誓死守嗣以族子孝養舅姑朝夕弗懈比歿喪葬如禮有司上狀于朝旌之

徐氏名德柔奉化人年十九歸舒燕家貧而嚴於禮節徐氏服勞無愠色甫半歲燕卒有娠彌月舉一男名季興母家憐其貧欲奪志徐曰貧寡命也若有他舅姑將誰托乎矢志益堅自甘澹泊奉祭祀尤謹舅姑歿歛葬如禮惟延師訓子以抵成立



鄉黨聞于官旌異其門

**舒氏**名淑初奉化人年二十歸朱春舉一子而春亡遂終身不御綵綺勤紡績以養姑舅訓其子容曰爾父不幸早亡舅氏顯達藉讀書之力汝能做倣萬一以酬父志我死無憾後容北遊官至秘書丞太史張翥爲節婦傳

**劉氏**名宜字淑靜鄞人年二十六歸定海樂壽孫三年壽孫渡江溺死同載者多不得屍劉氏生男甫周歲抱之沿流上下仰天哭而求屍屍忽自浮

得歛葬焉舅姑已先歿時年二十九獨撫遺孤勤苦守志克成家業有司奏旌其門

**童八娘**鄞之建舉人一日虎啣其祖母八娘曳虎尾顛天祈以身代虎爲釋祖母啣八娘而去時侍郎林栗侍親宦遊目擊其事旣而來守聞于朝

**金氏**名汝安鄞金良之女少以孝行聞父母多疾汝安侍奉惟謹及笄里中大家慕其賢爭欲致聘汝安曰父母老且病雖有兄弟驅馳門戶事柰朝夕養何卒不許自是絕葷茹蔬衣不綺繡夜則焚



香籲天願減已筭以益父母父先母一歲卒既服  
斬衰三年而又服母齊衰三年逮終喪年已四十  
七遂不嫁嘗有盜其貲者事覺欲訴于官汝安止  
之曰盜迫饑寒忍罪之乎其家乃已前史官危素  
傳其事爲之贊曰先民論楚大夫屈原之忠過乎  
忠者也予觀汝安之孝過乎孝者也然其行可以  
愧丈夫子矣

汪氏名本奇奉化人生而聰慧年二十六歸陳紹  
庭越四載夫亡無子夫未終語本奇曰汝伯姒方  
娠得子當以嗣我已而果生子鑄本奇子之慈愛  
即已出母族憐其貧欲奪其志本奇泣曰禮云一  
與之醮終身不改清苦固其常耳如復相強有死  
而已乃穿窬夫墓以示死必同穴孝舅姑供祭祀  
遇夫諱日必哽咽流涕撫其子讀書成人年六十  
九卒有司上其事旌之

樓氏名道真鄞人及笄歸張定山無子其媵汪生  
二子文海文慶撫育如己出歸六年夫疾革謂曰  
吾親老子幼不幸至是汝方年少我死汝自爲之



樓泣誓無異志既寡父兄復欲奪之號泣幾絕奉  
舅姑益謹命二子受業程端禮之門至正九年郡  
守阿般圖奏旌其門文海後以秀才授真定縣令  
董氏名守貞鄞人生而貞靜沉默不事容色女工  
之暇錄古人經驗方察藥性以衛養二親俟異母  
二弟成立乃字後十年方適范淦五年而夫亡竭  
貲治喪葬後姑與母欲奪其志董泣曰嘗聞三從  
之道守以終身夫亡幸有子寧舍之不從而棄夫  
宗祀乎矧姑與母皆老孰與供養如有復我者請  
以死答之逾十年姑亡又三年母亡悉力以供葬  
事教育子女皆成人年七十而卒郡以事聞旌表  
其門

翁氏名允正字淑真慈溪人配方琬純厚恭順克  
盡婦道生子景甫三歲而夫亡舅姑以盛年欲奪  
其志翁以死自誓喪祭一以禮奉舅姑益謹延師  
教子迄用有成自奉澹泊鄰族有匱乏者濟之無  
靳色縣令陳文昭奏旌其門

陳氏仁和人歸鄞之謝懷正生一子惟敬甫二歲



而亡時年二十父憐其早寡欲携以歸卒不從誓  
死以守日治紡績以奉姑教子年八十一卒郡守  
丘楠奏旌其門

祝氏名清鄞人生有淑德年二十三歸張穀寶時  
夫已疾革僅扶持成禮期月而卒初穀寶娶傅氏  
無子納二妾長馬生子遂孫次李生子康孫李性  
悍妬待傅氏無禮日攻其短傅氏以憤懣卒及清  
至李假主父遺命立已爲嫡俾清爲媵凡資產悉  
據有之清善遇馬氏鞠育其子如已出久之李復

搆族氏誘曰汝名雖嫁實則女也年少日長如孤  
苦何清正色曰吾旣廟見豈不爲張氏婦乎吾不  
幸命也惟安吾命而已何暇知他事乎誘者遂止  
清苦自守育其子遂孫長娶而有子子復生子及  
孫凡三世而清尚無恙壽八十五卒

顧氏天麟之女慈溪人年二十六歸沈景莊生子  
尚質暮而夫亡矢志辛勤紡績撫育其孤逮  
長教之親師讀書至正二十五年慶元路達魯花  
赤永安立門旌表 國朝洪武元年知縣耿讓奏



復其家

王氏慈溪人少聰慧長歸沈則年十六而夫亡二子稚弱親隣憐之勸其改節王氏泣而言曰婦人不二天姑嫜在堂二息在抱柰何棄之戚我夫于地下乎奉養益篤教二子惟勤庭無間言至正間有司聞于朝旌表其門 國朝洪武元年知縣耿讓奏復其家

國朝汪氏奉化陸元善妻祖姑與舅連喪元善遭疾亟謂婦曰吾家世貞潔汝稔知之今吾不起已

汝善撫二子乎婦泣曰諾元善遂卒時婦年二十七悉以奩具治喪葬緝麻桌以給衣食四時奉祀務於豐潔教二子從師友又撫妯之子一如已出待宗姻咸有禮度洪武五年有司上聞旌表

孫氏宋氏孫歸沈銘善宋歸沈銘禮俱慈溪人孫氏年二十九而夫亡生子甫八月宋氏年二十六而夫亡生二子皆在襁褓人以宋氏年尤少諷之嫁宋氏歎曰天降割吾姊妯妯守義吾獨忍棄去邪自誓凜如歲時歸寧母氏閔而諷之不聽曰迫



之果急惟以江水爲徑實見吾夫於地下耳婦姒日勤紡績澹泊清慎至白首猶一日洪武廿六年縣丞吳德仁聞于朝旌其門曰雙節

王氏名潤玉鄞人年十九歸胡谷銘質性婉婉生二子皆幼夫染瘵疾延及一門死亡畧盡潤玉時年二十餘獨抱遺孤處一室人共危之母家以其盛年無依力勸之歸且曰是家不祥而欲相從爲鬼邪盍改圖焉潤玉泣曰夫宗祀幸有子使吾一出是門寘胡氏神主何地乎吾未亡人禍福固非

所計自誓以死勤苦紡績撫養二子壽七十二而卒

陳婦五節奉化陳元叔寶娶竺氏叔寶生侗娶璩氏侗生瑞娶王氏瑞生通甫娶樓氏通甫生養才娶樓氏五世之夫皆蚤亡其婦皆守節國子助教貝瓊爲作貞節傳表之

張氏慈溪人年二十六歸沈性生子二如錫如鐵皆襁褓而夫亡時方二十九姑胡氏年老張氏奉姑毓子紡績勤苦終始一節姑歿葬祭如禮洪武



二十八年知縣吳彥得奏旌其門

王氏象山人年十九歸同邑周彥博生一子夫喪時年二十二志不他適教子繼先世之業守節五十年洪武三十一年詔旌其門

王氏奉化袁公桓妻名恭歸袁氏事舅姑相夫有禮洪武戊辰夫從戍越雋尋沒不還王年二十九三子皆幼值家多故資用衰薄宗族語之曰舅姑既老子方孩將安依乎王忿曰吾不即死以從夫者正以舅姑老而兒弱也勵志堅守雖貧苦未嘗

戚形於色居五十餘年終始一節年八十一而卒蔡氏定海湯彥敬妻年二十三夫亡二子孩幼清苦守節六十餘年子懋永樂間領鄉薦有司上其事未及聞而卒

李氏戴樗妻勤人樗貧甚樵海爲業忽颶風大作溺死李聞計慟哭茹蔬苦寢終其喪父憫之諷令他適李即哭泣誓死昕夕躬紡織撫子稍長乃命傭作錢塘以供饗殮有司奏旌其門  
李婦雙節奉化李某娶沈氏生子七月而寡及子



長沈爲娶兄女爲婦生二子公達公復亦寡婦姑  
相守撫育孤弱弗墜宗祀人號其所居之堂曰雙  
節翰林宋濂爲作傳

吳氏奉化史文可之妻名妙清有淑行年十六適  
史氏二十生子均庭晬而夫亡守節不渝奉姑字  
孤孝慈備至旣而舅姑與子先後云亡三喪相仍  
窘棘益甚而禮節不違貞心苦行鄉里稱之

童氏奉化單仲饒妻事姑甚謹姑遘瘧疾醫更年  
弗愈乃曰聞古人有割股愈疾者今彌留如是萬  
一可濟乃潛礪刃候姑求肉捽左股割之芼之以  
進姑異其味問其所由來其姒具言之姑爲悲感  
弗任疾亦尋愈單仲友爲作孝婦傳

袁氏名秀芝奉化人年十八歸竺公能七年而公  
能卒袁時年二十四歲歎家艱姑趙氏患痢兩月  
袁氏衣不解帶浣滌穢汚疾傳染徧其族袁獨無  
恙人以爲孝誠所感後舅姑繼亡罄粧奩營葬已  
而繼母李憐其少寡欲奪其志袁仰天自誓剝指  
以示意紡績自給撫遺孤曰端曰恢讀書力田天



順改元知縣馬毅上于朝旌之

石氏字景榮鄱陽人縣丞石思孟女少解文字年二十奉化宋原用任鄱陽教諭因娶焉閱六載原用卒石氏時年二十三二子俱幼母氏欲留之石泣曰夫死即未亡人爾今舍二孤棄舅姑失三從之義吾忍爲此獸行邪嚙指自誓母不能強遂奉喪歸及抵家糧無宿儲艱苦殆甚石盡貲裝以養舅姑舅嘗患疫痢石衣不解帶侍奉無怠及舅姑歿葬祭盡禮勤紡績教二子尤嚴於禮節鄉族婦女咸服其化宣德間有司奏旌其門

孫氏慈溪人年十九歸王祖禧二十二而夫亡家貧守志不移事姑盡孝生子涸甫四月撫育成人爲邑庠弟子員中宣德四年鄉試任福建南清縣學教諭有司奏旌其門

宋氏奉化陳文昕妻贈兵部侍郎宋原亮女名淑瑛歸陳未幾而文昕爲吏于閩卒生三子皆幼淑瑛扶喪携幼而還食貧苦節堅守無他年七十餘有司奏旌其門



張氏名相字敬助父爲餘姚張雲航先生有隱德善識鑒每奇其女教之經義適慈溪王明白先生之子伯壘爲金溪令有能聲雲航嘗囑其女曰得甥當告我舉首子以告視之曰來矣名之曰來再舉子再告之曰復來矣名之曰復旣以第三甥告曰亦足與兄鼎足而立名之曰鼎來復同中宣德丙午科來爲工部尚書復舉進士爲刑部主事鼎爲御史終廣東僉事張封太夫人相夫教子一以古人爲法金溪旣沒日三復敬羨君子能勞後世有繼之言以勗諸子大書日新於書齋以示警子在宦邸每手書箴訓諄諄以竭忠報主和僚友迪子姓爲規終不及其他來征湖貴時手製汗衫遺之云非爲不足汝所特使汝知我尚康庶得安心王事不以我老爲念耳及凱還復戒以毋自矜伐以全居美之道其手澤至今子孫寶焉

楊氏醫學訓術陸壻妻勤人年二十四夫死生子倬才三歲僑才八月即屏斥鉛華終身縞素含藥茹荼躬績絰以教子雖劇寒暑不廢壽五十七終



弘治十五年詔旌其門

劉氏慈谿人聘於馮光濟光濟卒父宦所劉時年十七聞訃即哀毀如不欲生櫬歸劉請歸馮治喪母憐之不可哭曰聘不爲先婚不爲後不負此心死無憾矣遂奔喪命治兩壙壙啓欲投以殉姑力挽之遂終身不御鉛綺獨處一室日事績紉族人舉不得面事聞詔旌其門邑令王公題曰貞淑

鄭氏名惟孝慈人海豐尹鄭淵女歸翁錄錄奉例輸米携鄭上京卒於途鄭扶櫬歸葬時年二十七

無子翁伯仲欲奪其志鄭曰有姑在姑亡又欲奪之曰有父母在遂大歸於宗織紉自給及父母亡屏處敝舍瓦鐺地爐以供朝夕年踰六十出所積治棺衾繇物甫具以疾卒詔旌其門

馮氏慈谿人舉人姚鉢之妻鉢卒時馮年二十四二孤許潛在襁褓姑楊垂白在堂奉養三十餘年未嘗以貧故缺其旨日夜督率其子潛學成舉進士事聞詔旌其門以子貴封太安人

守貞娘子者鄞楊孟輝女也甫八歲字俞氏子頃



寧波府志卷四  
之俞氏子死俞氏請以仲繼楊父母許之守貞聞  
嘗悒悒不樂比俞請婚期守貞以死自誓泣拜母  
前曰兒死矣兒死矣大人許兒爲俞某婦疇知有  
仲也願大人以兒子畜之雖白首不悔父母憐而  
許之遂守一閤絕不與家人相接至六十四而卒  
楊氏私諡爲守貞云

趙女大娘奉化趙鎮之女父母連喪女時年十八  
尚未納采弟淦幼未能立女念無以撫淦者遂誓  
不嫁育淦成長至娶妻生子曰英曰豪時年四十  
士夫皆重其德欲令歸於貴族而其弟旋沒女又  
誓不嫁撫其二姪比英豪繼沒又撫英之子諫女  
終不嫁而宗祀賴以不墜人稱爲孝女云  
黃氏定海人年二十歸鄒誠二十九而夫疾剗股  
療之不痊哀毀欲絕養姑盡孝守節三十二年鄉  
里稱之無間言有司奏旌其門  
俞氏鄞人年二十歸章智通二十四而夫亡父母  
欲奪其志乃斷髮自誓勤苦紡績撫幼子成立守  
節三十八年有司奏旌其門



寧波府志卷四  
三十五  
周氏慈人性敏慧頗知書其夫桂一祿充邑庠生  
不三歲而卒周哭之哀死而復蘇有媒氏以巧言  
動之輒誑曰此言何至於我耳遂斷髮自誓不修  
容儀對娣姒亦無笑容守志五十六年純行如玉  
天順壬辰有司奏旌其門

張氏名如滇鄞人年二十二歸包文助甫朞月生  
子旬未及晬而文助夭夫之女弟誘以改志毅然  
不聽女弟見不可奪夜偽爲鬼祟以怖之張知其  
僞覆燈以覘俟祟發即啓燈女弟大慚而退自是  
屏華飾勤紡績養姑育子卒振包氏之宗旬長丕  
弘家業孫曾蟄蟄年八十餘而終後曾孫澤溥聯  
舉科第爲御史人以爲節義之報云

黃氏鄞人潤王之女孫也方在閨宗戚賢之稱曰  
黃姑姑年十九歸倪元三年而元沒氏撫棺慟數  
欲絕或勉之曰祖姑在堂二季齟齬柰何不爲倪  
氏宗祀計乎氏乃飲泣奉姑方具得懽心撫二季  
甚悉曰幸倪氏不絕二季當有子我則撫而嗣之  
旣而姑沒殯送如禮父嘗病瘡三年氏爲之延醫



遍叩羣望病竟得愈人稱其孝年八十五而終  
王氏慈邑劉圭妻司空來之女也年十八歸劉氏  
甫一年而夫夭遺腹生子鍾自誓無他志遂屏飾  
持儉約履不踰閩貞節凜然其舅性素嚴節婦事  
之曲盡婦道宗黨賢之成化戊子知縣龍伯奏旌  
其門

陸氏鄞人刑部主事謙光之姊諳曉孝經列女傳  
大義年十八歸朱瓏事姑甚孝瓏時爲諸生每然  
燈相夜讀勉繼前修四載夫卒無子誓無二志撫

姪如已出貧莫以存紡績自給庭無間言年七十  
三忽一日浴沐更衣語家人曰吾將還造化矣端  
坐長逝

徐氏錢勗妻鄞人勗客閩而死徐聞訃哀毀幾不  
能生時年二十八悉屏華靡晨昏績紉不少怠鄰  
媿憐其少寡以微詞諷之即厲聲曰未亡人但知  
待死而已不知有他辛勤守志卒全其節成化初  
詔表其門

徐協妻余氏鄞人年二十五夫亡無子誓死終天



撫孤女嫁士人陸儻成化七年詔旌其門  
任氏慈人性貞肅年二十歸徐傑甫二年而傑應  
試不第怏怏致疾將屬纊子錦方在娠婦遽謂其  
夫曰君上有母而吾幸有娠必期奉母育孤以存  
若後誓不毀節辱君也已而夫亡既一月子錦生  
育之漸長使讀父書鬻環釧以佐費勤織紉以資  
養卒成其子錦第進士仕至巡撫都御史

周氏慈人年十九歸沈愚基而夫卒子杞尚在姪  
姑語曰家業潰謝無可資給汝姪男女未可知宜  
自量所終既而生子杞鞠之辛勤又憐之曰兒未  
必立無自苦也婦竊入寢室引繩自經人覺而解  
之守志終不移年八十餘而卒成化壬辰有司奏  
旌其門

陳氏定海衛陳瓊女年二十適畢儒至京越六年  
夫故生一子瞽守志不渝年七十八而終成化二  
年指揮李綱奏旌其門

謝氏名媿姝張昺妻鄞人年十八適昺祇役京  
師以病卒時謝年二十九計聞哀毀骨立輒卸鉛



寧波府志卷四  
六三頁七  
華事紡績奉寡姑王氏甚至撫二子俱成立次男  
誠充郡庠弟子員年二十八而喪婦陳氏甫二十  
六歲依寡姑守義冰蘖著聞薦紳稱為雙節成化  
四年詔旌其門

王氏出自慈谿故族夙閑禮訓適劉燭甚得婦儀  
既寡每自誦詩匪石之言貞信自持迄無改行授  
其子覲以書卷曰此而父遺也爾能讀之以成身  
則而父亦瞑於地下矣覲由是發憤修學登成化  
丙午鄉薦有司奏旌其門

董氏鄞御史董琳女適錢紀紀自幼業儒董勤女  
紅相其誦讀已而紀劬勤病卒董方年二十二歲  
哀毀骨立即飲茶茹蘖白首不渝竟全其節奏旌  
其門

王氏鄞太守王瑩之從女也及笄歸定海樂恕三  
年而恕卒王以栢舟自誓撫七月之孤足不踰閭  
闔雖歲時不御羅綺白首如一日知縣鄭餘慶名  
其堂曰貞壽

呂氏奉化人周洪妻歸周時年十九成化十四年



疫厲盛行翁姑繼沒夫亦隨故呂典衣裝歛殯三喪齊舉一子甫二暮內外無倚母勸令改圖輒慟哭誓無他志朝夕紡績以充衣食

馮氏慈人贈工部主事趙勝妻二十五而夫亡母欲奪其志婦聞號泣焚香告天誓欲自盡姊姒相守累日始免其母懼而止取姪暎爲嗣恩之甚篤自授以句讀稍長令就舉子業暎登進士授工部主事遂得錫封

黃氏奉化韓彬三之妻夫亡時黃年二十三賣衣備槨以葬父母欲改嫁之泣誓不許守節四十八年年已七十有司奏旌其門

錢氏慈人陳銀妻少寡守節其子熙幼有敏資錢勗之學卒以文顯後官御史乃克表母節言于有司奏旌其門

桂氏慈人適馮俊俊遊庠校有聲皆桂相其勤生子本澄而夫沒桂遂堅守無他日檢遺書令本澄讀之朝夕誨勵不懈本澄登進士第官至刑部郎中縣上其事詔立門以表宅里



曹氏寧波衛千戶曹謄女歸奉化項愨愨卒時年二十一遺孤祗一月曹鬻裝以禮葬愨孝養老姑呂撫育其子甘貧守節姑憐而試之曹輒號泣自誓營墳夫塚之旁以自待朝夕課子讀書即南寧訓導穎也守節四十餘年弘治己未詔旌其門王氏慈人既聘於陳而夫佳病且革爲娶婦以慰之及門即入侍湯藥未幾佳屬續時婦年方十七即屏去簪珥服御衣斬衰誓不再嫁後姑張遇之無恩責其未成禮而守爲無名婦曰既入陳氏之

門經事君子何謂無名張乃使人邀其二弟從容諷之婦不答入臥內截髮以示張終欲強之窘辱百至二小姑凌之若婢稍不順輒爪其面張聞復加箠楚節婦口不出怨言曰不逼嫁爲婢亦甘也每夕寢處小姑牀下受卑濕得偃疾節婦私自幸曰自今吾知免矣鞠其猶子梅爲嗣保愛過於已出教之業文後領鄉薦典教祁門成化間有司上其事下憲臣覈之吏索賄不副事遂寢

潘氏慈邑馮默妻默之兄默以事繫刑部獄默奔



省之道病死子厚方在賑三月家徒壁立四顧靡  
依潘乃自誓曰夫既死義妾獨以貧困故忍爲不  
義以污之乎遂堅志守節彌月而生子厚紡績織  
紵以給衣食子長使就師傅後厚應薦爲寧府長  
史而母猶及祿養

汪氏慈人聘於張未適其夫鸞遊閩中父母度其  
將返預娶汪過門月餘忽報鸞死矣汪驚怛仆地  
移時方蘇誓無他志其母憐其未成婦誘以歸諭  
之使他汪乃投簪取珥薙其衣擲地曰還汪家物  
歸張氏身即登舟而返獨守孀閨未嘗踰戶後忽  
病疹危甚翁姑爲之迎醫汪却之曰吾得死所矣  
豈須藉醫求活邪遂卒遠近憐而賢之

徐氏慈谿人定海金傑妻也傑兄以罪逮京師傑  
往請代瀕行時徐已有身傑顧謂曰予去生死不  
可知生女已矣即生男可善撫之金氏鬼庶得食  
也已而悔曰吾幾悞君傑去萬無生還理即死汝  
可善事後人徐飲泣曰君誤矣君以義往上必義  
君君兄弟當同歸無過苦也即如君言妾有死而



寧沙州志卷五  
三十一  
三十一  
已敢忘托乎已而果生男曰常居無何傑兄得生  
還而傑竟死獄中計聞徐哀毀不欲生乃撫孤慟  
曰我本欲從汝父地下柰金氏宗枋何強起括奩  
具營葬事服闋父母或勸之他適乃引刀截髮斷  
指以死誓時年二十二茹澹攻苦績緝給食以教  
子年八十餘卒孫璿舉鄉貢爲寶慶推官縣令李  
鑾扁其堂曰節義云

馬氏奉化人年十八適余慶怙時夫已疾篤一面  
而卒氏哀不自勝即守喪不復歸服闋姑與母憐

之將改醮焉氏泣涕欲死姑與母懼而從之家貧  
勤紡績以養姑比死極力喪葬卒老余氏

朱氏慈人適阮奉先年十九而寡子其姪文晷恩  
意特厚教以禮義子孫率其訓三世不異產

鄔氏字淑貞鄞人年十九歸沈歇三年夫亡子纔  
四月家道甚窘父母舅姑欲奪其志淑貞嚙指自  
誓惟勤紡績以營衣食供舅姑壽八十三而終  
王氏奉化人許嫁周濂未娶濂病旣革索見其妻  
不已母送女至門濂一見即絕王氏守喪辭母痛



誓不反終身無變志

劉氏奉化曹琨妻年二十琨亡時舅姑俱喪祖姑張憐其少寡煢煢相依劉矢心苦節張疾供具湯藥惟謹臨終謂之曰勿以我存歿二心劉以死誓喪葬盡禮悉屏華麗無所用於祀事必極豐潔宗黨咸稱其節焉弘治己亥有司上其事特旌其門董氏名如珮鄞之望族也年二十二歲歸于屠湘逾三年而夫沒一子復夭董氏誓死守志終始一節弘治間有司奏旌其門

徐氏鄞人正統丁卯科舉人陸厚妻厚會試下第入監卒業歸而道卒時徐年方二十六生子才五歲聞訃哀毀幾絕者屢喪葬畢貧窶殊甚日夕紡績治生勤苦萬狀養舅姑育遺孤終其身不御華飾郡爲表奏弘治十二年詔旌其門

王氏張公曄妻鄞人年二十一而寡婦王氏張純妻年三十二而寡時純長子懋方七齡次子恒尚乳哺姑婦抱持遺孩朝夕相弔煢煢如也日惟修齋供佛賑恤窶貧飲食必祝曰天天其尚延張氏



乎於時謂二氏拮据茹孤邁古貞烈矣已而恒亦  
天其妻薛氏知州穰之女年二十四而寡以伯氏  
子時政爲後孀居苦節凡三十餘年以貞潔終一  
門三節里黨稱之

徐氏鄞人年十八歸豐勲力學篤行人稱醇儒  
三十而卒無嗣徐時二十五誓以死殉自投於地  
傷手足姑周太宜人救之乃免自是衰麻素食終  
其身事太宜人曲盡孝道問安視膳畢即入室堅  
杜其扉雖猶子莫得見正統八年有司以聞詔旌  
貞孝之門壽八十四而卒卒之日其姊史宜人視  
之徐端坐於榻舉手稱謝再三且曰子孫幸力爲  
善合掌而逝

李氏名守徵慈人歸刑部主事王復之子鎬鎬爲  
邑諸生早卒剪爪髮殉葬以明不貳時舅姑已沒  
惟曾姑張太夫人在堂事之甚孝太夫人憐其貧  
乏戒母供饋孺人勤紡績益致甘旨宗族稱爲節  
孝三子在襁褓撫而教之皆有成立弘治中知縣  
和鵬上其事旌之



凌氏慈人弘治壬子舉人張維妻維卒時年二十  
五有子四歲而殤因歸省其兄諷之改圖凌不勝  
悲憤哭嚙其唇血灑地遂終身不歸寧舅姑慰  
之曰已不幸絕嗣生計無賴吾二人日逼桑榆爾  
生尚遠柰何爲活邪節婦曰恥辱事重餓死甘之  
乃出簪珥爲舅納妾得子紹喜曰張氏不絕亡夫  
墓門且有寒食矣後舅瘋臥姑目雙瞽節婦紡績  
以養凡二十年不衰邑令葉竦重其節置田五畝  
資之巡按端廷赦爲之下省覆勘以無力竟寢其  
後幼者未壯而荒喪相仍節婦亦老且憊竟以餒  
死

褚氏鄞人張道成妻年二十五而寡守節終身子  
清克孝遇褚危疾即剖右臂和藥療之母即瘞中  
貴歐某太守鄭珞嘉其事皆遺以米肉以節孝表  
其間後褚卒清廬墓三年有紫芝之祥未幾清卒  
妻孫氏亦守節辛勤撫其孤戩戴成人會孫感鬱  
疾戩念父療母事因亦剖臂作羹進之孫復愈張  
姑婦雙節而清與戩剖臂致孝奕世載德人多稱



寧波府志卷四  
之主事宗佑爲題其居曰世全節孝爲文記之  
許氏二婦妣王氏許福延妻年二十一福延亡婦  
王氏許福貞妻年二十三福貞亡相與砥礪守節  
有司廉其實以聞適娣氏歿惟妣氏得旌表云許  
氏奉化鮎鯨人

周氏奉化周若之女歸宋昆昆病瘡劇婦以口吮  
其血每嚼土蠱以塗瘡瘡愈後昆中風死婦號慟  
絕而復蘇時年二十一息在槨椁四壁如懸磬  
盡鬻衣裝以斂不能營葬者二年朝夕悲泣若初

喪宗人宋時振憐其義割地與之婦自負土以葬  
上事垂白下哺黃口劬勞樵汲無毫髮怨懟又鞠  
夫幼弟以爲門戶計至有室家相繼而亡未幾姑  
與子又相繼而亡婦復負土葬姑如其夫有富人  
慕其女紅欲求爲婦者使隣媪袖金環以諷之曰  
一門盡矣無一瓦之覆一壠之植若何恃乎婦堅  
不可奪媪慙而退饑寒迫身惟紡績補綴爲活所  
居風雨摧壞假祖屋簷下縛茅以自存艱苦之狀  
人不忍見多爲之流涕者



寧波府志卷四  
陸氏鄞人太守坡之姊年十八歸于宋漢漢疾焚香祝天願以身代漢竟卒氏哭之慟絕而復蘇日勤紡績以養二親有欲奪其志者輒忿叱之卒全其節正德丁卯有司奏旌其門

陳氏奉化學生嚴九霄妻九霄卒陳躡踊哀毀幾絕姑徐年老多疾遺孤在懷罄資奉養徐恐其年少不終以語試之陳即大慟誓不他適其伯氏亦強之乃復大慟卒以節自完正德辛未朝命旌其門姪婦王氏嚴龍妻年二十五而夫亡撫其姪爲子至七十歲而卒其節亦如陳氏云

陳氏鄞人年二十歸聞能未幾能卒哀毀骨立時姪子方六月後服闋即卸華飾斷葷茹姑慮其年少家貧微探之泣曰即無後尚欲保姑天年况幸而有子乎以死自誓養姑愈謹正德甲戌詔旌其門

項氏名如蕙奉化王玄浹妻歸王甫二暮而夫沒遺孤一方在襁褓哀毀骨立姑憐其少欲奪之項泣涕自經姑覺而解之與終其志自是謝鉛華躬



紡績課子讀書奉姑尤謹比沒葬祭盡禮正德辛未詔旌其門

原氏奉化周汝昌妻年二十而汝昌沒止遺一子亦沒家益陵替原紡績織紝艱苦萬狀守節四十餘年未嘗一窺戶年七十餘卒

徐氏奉化田祿妻年二十八生孩甫五月祿病喉不能言垂沒瞪目視父弗休婦喻其意泣曰君亡妻寡命也舅姑年老君弗養妾當其責撫育遺孤以延世緒俟死而已天地鬼神可質也祿遂瞑居

喪盡哀勤劬紡紝訓子以儒業族議請旌徐辭曰夫死守義婦道之常何以旌爲守節四十六年卒年七十三

孫氏慈邑劉越妻年二十一而夫亡舅姑憐其少寡欲嫁之氏乃斷髮焚夫柩前曰吾志若移有如此髮因留其柩不發終日坐柩傍以事紡績鞠子既成始發柩葬之正德三年縣舉其節旌焉劉氏自劉圭劉燭并劉越妻一門三節人傳以爲異李烈婦胡氏鄞人年十八歸縣學生李珂字朝玉



二十五而珂死一男一女胡守室中絕跡不踰閩  
正德十年十二月二十七日夜火作於鄰珂兄珮  
往救之胡扃戶而應曰阿姆來吾乃出珮使妻陳  
往胡以七歲男自牖付之囑曰幸念李秀才善視  
之陳曰媻將何如胡給之曰取少首飾即出陳去  
胡即疊數箱於牖下几上抱三歲女端坐而死時  
年二十九

劉氏守貞慈谿人爲姚澤配相夫力學甫三歲而  
夫卒劉謝膏沐茹蔬素始終一節撫教其子業儒  
成名正德中有司奏旌其門人其河爲不指入之  
楊氏忻玉妻鄞人年十九玉病疽楊吮之後死楊  
慟哭亦絕三日家人具殮乃蘇猶噫噫作哭聲遂  
斷髮死誓無他志每食必依玉柩側玉嗜鯉每忌  
日必設鯉一年偶值河枯無從覓楊悲慟不已忽  
一漁父持鯉至以一金得之祭畢食胙得原金於  
魚腹中人大異之以爲哀感所致呼爲哀感孺人  
年八十二卒

陳節婦定海倪氏夫曰陳襄字匡國鄞人爲郡庠



生試高等未第而卒節婦年三十無子而貧甚力  
女紅以養姑人有聞其姿者遣媒白其姑節婦煎  
沸湯漬其面左目爆出又以煙煤塗其傷遂益瘠  
惡媒乃不來歷二十年姑七十餘而卒節婦哀慟  
不食而死匡國亦有才行臨終謂節婦曰善事吾  
母竟孝養終身

周氏諱應祿鄞人幼明淑通孝經女誠及笄歸同  
邑謝璫一日璫論曹令女事曰令女金石爲心流  
芳千古汝能之乎周曰彼亦人耳何爲不能久之

璫客死會稽周聞計頓絕時年甫二十六而子表  
方三歲即脫簪珥倩人歸骨以葬而豫穿已穴柩  
馬子縈哮疾疴羸日甚昕夕祝曰天不絕謝氏幸  
全吾兒忽夜夢神人語之曰汝兒明年上元疾當  
愈已而果然歲時祭祀未嘗不涕泣交下旣罷不  
食終日撫諸孫汝儀等慈而且嚴孝經諸書皆自  
口授年七十五汝儀舉進士縣令蔣福陵奏旌其  
門

余氏慈邑人未笄適姚克周其姑病足而瞽節婦



寧波府志卷四  
以物如板輿者舁之出入姑甚德之及疾革謂婦  
曰吾無以報汝汝常病淋吾沒後當陰相汝令汝  
即愈也已而果然姑沒夫亦喪而家益貧二子舜  
宗舜傳尚幼苦節垂三十年及卒舉手謝衆曰今  
日始無愧妣氏之婦矣

馮氏慈人正德庚辰會試榜陳原理妻值武宗南  
巡不果廷試病卒下邳馮時年二十二無後舅姑  
老業且凋落惟勤紡績爲儉居具舖之費與一婢  
俱外戶不窺內言不出娣潘氏亦少寡歲時聚享

誓相死守郡丞顧錫巖悼之曰曉閣共悲雙鏡破  
夜窻聯織一燈寒讀者墮淚巡按李奏旌其門

蔡氏定海人年十六歸董相相卒蔡方二十歲父  
母憐其少寡且無嗣誘之他適蔡飲泣誓死茹荼  
攻苦昕夕緝女紅以養舅姑艱辛萬狀督學副使  
孔天胤表其門

王氏慈人仇治妻年二十一夫喪無子堅操守志  
父母舅姑逼使改適王泣誓蚤夜紡績未嘗臨鏡  
清苦自力閭里稱之



薛氏名志貞鄞人封通判魁之女性至孝年十七歸於同邑李維勤冬官亞卿堂從子也舉一女而維勤病瘵三年盡棄簪珥爲藥食費夕必稽顙籲天請以身代年二十二而維勤竟卒或憐而諷之輒泣曰人而甘獸乎薛李故望族誰當爲此者若有之除日自西出耳即聯穴於夫朝夕忍泣以奉姑撫女絕不御膏沐綵綺姑老癰發背加以腫滿不能臥薛朝夕抱持以身爲籍背不就席者幾三月而姑卒憂勞哀毀遂成痞鬱之疾年四十而卒

薛處女尚四諱義前江浙分省醫學提舉薛明道之女生稟淑質穎悟過人女德女工不煩姆教許嫁宦家子早世遂貞守不嫁時元季民困供億內外應門日給不暇堂上定省或曠處女相其兄嫂弟娣奉事晨夕惟謹上下安順翕然以和且以奩具植孝思祠堂於版橋父墓側至今薛氏世享焉潘氏李郭翁妻鄞人年二十歸李事舅姑極孝敬繼姑王氏溺愛少子每以非禮加潘潘委曲承順務得其懽王亦感悟稱慈後病痿潘事湯藥抱持



之雖中裙廁踰必躬滌不懈後又事繼姑陳無異  
事王宣德元年時疫大作舅與夫相繼死雖至親  
不敢近潘稽顙籲天願以身代姑遂不死而潘亦  
無恙時潘年二十九二子尚幼誓不易志歲饑或  
勸其鬻書以自給潘曰李氏累世所積以貽子孫  
者惟此耳忍輕棄邪乃拮据匍匐躬織作以養姑  
教子太守張瓚上其事詔旌其門

阮氏定海人性慈順敦朴適儒士韓克相未幾相  
卒時家多艱阮氏年甫二十即矢志守節備嘗苦  
辛敬事舅姑久而彌篤遺腹孤繼宗力爲鞠育訓  
以義方長遊藝苑竟成夫志鄉人咸稱仰焉嘉靖  
三年縣令鄭餘慶嘉之表其門曰貞節壽至七十  
四而終

王氏定海人歸鄞倪鉞即復之季弟也鉞性不甚  
慧居以蒔花疊石爲適王從容勉使從伯氏習家  
政平居奉鉞愛敬備至一女二子幼者纔四月適  
瘡疹甚劇而鉞忽夢慄暴卒王時年二十七崩痛  
罔極而又甚危其子飲哀調攝幸各保全曰吾夫



庶不死矣膏夜紉針自誓撫子中更衰落每至不  
給益慷慨勵其子曰丈夫會有消長無事戚戚惟  
恐海乾人白頭耳後家亦稍樹至八十四以節壽  
終

何處女鄞何清女幼字於樟村之應仁及十六忽  
得胃脘疾不愈應將迎之女曰吾已不幸嬰疾可  
復以身爲人累邪卒依父母終其身比父歿竟大  
號哭自毀以卒清之後至今以貞女祀之  
楊氏鄞人張性妻年二十四而寡無子以伯氏子

爲後貞潔一操自誓鬼神早夜紡績以資生事即  
祈寒暑雨不廢組紉浣濯衣裳楚楚終其身不近  
塵垢儉節食費稍致充饒人以爲難

蔣氏鄞人歸唐璋年二十八而夫亡時長子四歲  
次子一歲或以子幼家貧諷之改圖者蔣遂斷髮  
以誓閉戶紡績撫育二子成人每訓以罔作非爲  
壽八十而卒鄉隣賢之

余氏名德貞鄞人年十九歸府學生員趙勤不二  
年勤病故止遺一子文志方一週母子伶仃適遭



軍海府志卷中  
三十六  
三十三  
回祿兼之歲饑草棲絕粒族之人有欲奪其志者  
德貞即斷髮折指以死自誓躬勤紡績以資朝夕  
撫養文志俾承父業始終四十八年凡六十八歲  
而卒

王氏鄞人年十八歸朱泉泉遭疾宛轉侍衾簣涕  
泣露禱請以身代及卒躄踴號慟欲繼以死時遺  
孤應樞暨女俱幼哀啼扶抱人不忍觀爲子擇賢  
師教之奉姑氏畜猶子傾貲以出父於獄皆人情  
所難死之日無間親踈遠近咸爲吁嗟焉

孫氏慈谿人年十八歸定海黃誼昭生子湑三載  
而夫亡孫以死自誓延師教子長求兄女爲配甫  
三年生二子湑亦故適國初糧餉至重乃婦姑相  
率携子與僕輸賦南畿訴尚書蹇義言海潮爲患  
十年九荒乞築海塘以障居民蹇詰曰如此孤苦  
何爲不嫁對曰餓死事極小失節事極大蹇愧俯  
首拍案久之次日遂爲奏請差薛主事至都卒成  
之起自龍山迄於觀海永免潮患立碑廟祀焉  
劉氏定海人年二十適本邑黃倫生二子而夫亡



時年二十七哀毀幾絕自誓不移孝養舅姑治家  
教子咸有成立卒年八十五詔旌其門

周氏慈谿人年十九歸定海黃鷲甫三月鷲有事  
南畿道病還閱兩月而亡周哀毀幾絕後父病歸  
寧母氏諷奪其志輒忿泣趨簷下欲觸破甕以示  
遺孕二嫂急持而止即日徒步歸黃深居不出一  
日忽有翠鳥飛集右手感泣不已姑語舅閱恠書  
而慰之曰翠鳥鷹揚之物得男之兆也不數日果  
生子橋教育有成有司奏請旌表旣覆勘而卒

徐氏三節鄞儒士徐奎妻王氏生子海五歲奎卒  
王時年二十三事姑孝敬撫育遺孤海娶余氏備  
暮海卒余時年十九遺孕五月逮生子名曰定示  
其志有定也遭家日落力勤紡織以養姑定娶周  
氏甫二載定卒親族或勸之曰汝無子恐弗可以  
終周曰守節視子有無懷二心耳乃子族人之子  
竟以節終徐氏三世嫠居皆不踰壺鄉人稱之  
趙氏鄞舉人張珍妻方歸時家徒四壁立疏食水  
飲昕夕勤女紅相珍誦讀學成薦于鄉未踰年卒



趙時年二十一孤苦萬狀以死自誓惟勤女紅以自給然終其身不爲男子服別嫌明微類皆天至坐臥一小樓雖極寒暑不下至白首宗戚尚有不識其面者趙氏諸子姓有過必曰毋使祖姑知之其見嚴於人如此

毛氏鄞人歸陳氏子二歲而夫亡時年十九輒斷髮自誓不奪其志遺腹生子榮極力教字之與叔氏別居以遠嫌旣久或欲舉而旌之力拒乃止湯氏定海人少閑女誠事父母以孝聞其父珍之

不輕字乃歸進士徐潭爲繼室潭令上海每佐以清白已而潭改令湘潭遷知崖州以卒湯哭之慟時年二十九無親產子乃力撫前妻子女畢其婚嫁而時教以義方各有成立躬行勤儉以植其家閩範莊嚴數十年如一日人稱爲義貞云

樂氏鄞人歸傅湖生子僅孩提湖得心疾竟卒時舅姑早亡又無伯叔可倚乃含哀燈紉雨績以撫其孤饘粥每不繼父母憐而諷之誓死不渝久之貧苦愈甚父詔以母病歸省欲奪其志見母無恙



陰識其意乘間携子步歸竟秉志守節以壽終  
黃氏年十九歸鄞邑庠生虞汴二十四而夫亡生子甫九月父母憫其少欲奪其志黃氏以死自誓號泣幾絕自是不敢復言遂終身不歸寧辛勤紡績孝養舅姑遇夫忌日必哽咽流涕撫育其子而教之凡四十餘年清白如一日  
何氏鄞人其夫徐良璧以游學客死于吳何時年二十五忍死畢喪葬事舅姑撫嬰幼備嘗荼苦家既克立子亦有成人皆賢之

王氏鄞俞玉妻年十六歸玉合卺甫二十二日王應里役僅二十二歲以瘵殞王氏輒閉門躬麻桌治井旨奉舅姑無怠茹苦攻淡至七十九卒  
陸氏名莊昌國千戶女年十八歸鮑德斌爲繼室先徐氏生五子曰鑰銀錡鏘銓莊生二子曰欽鏡德斌卒莊年二十四父母欲奪其志莊曰夫以七子相托吾出門寘此曹何地邪即以死自誓撫養七子慈惠嚴肅人無間言壽七十七而卒  
管氏盧璉妻鄞人年二十八夫死撫遺孤才三月



寧波府志卷四  
三十一  
即誓死無他志終身不御華綺克家教子卒底成  
立

陳氏名金象山人適馬岡蔣邦沛夫染瘵疾謂其  
妻曰吾不支矣汝年方少我死汝自爲之妻泣誓  
曰生則同生死則同死吾不知其他一日夫病亟  
乃沐浴更衣斂束手足潛自服瀟謂家人曰吾身  
殊不快即假寢夫側旣而呼之氣已絕矣其舅謂  
其夫曰汝婦死矣邦沛強顧之亦瞑目而逝

丘氏鄞人年十八歸郡庠生黃毅生二子巽始垂  
髮益在懷抱而夫亡丘時方二十餘即斷髮自誓  
以育二孤稍長遣從師每夜分躬執麻象以督誦  
讀巽成進士官南京刑部主事敕封安人有司奏  
旌其門

王氏鄞人適楊文瑜旣而夫戕于傲弟不得其死  
時婦年二十八號泣屢絕憤憤欲自經以方娠不  
果姑以家貧必欲奪其志遂嚙地籲天誓以必死  
逾月生子鎬婦曰幸得此吾願遂矣于是含冤茹  
苦撫遺孤而督之成足不踰閩目不窺戶言笑未



嘗輕啓屏絕膏沐宗戚罕見顏面每歲時追祀輒  
涕淚不食孝養其姑雖凶荒不替甘旨嘉靖壬午  
詔旌其門

向氏慈人適儒士葉宗倫相之游學脫簪珥衣奩  
資其脩餽倫感激刻勵苦心積勞忽驚厥卒于寓  
館向撫心咎曰天乎吾速君死吾何用生爲輿尸  
歸葬欲自殉姑謹持之弗果時年二十餘縞衣茹  
素人罕覲其面善事姑迄考終有司奏旌其門  
秦氏慈人年十七歸于周杭甫其杭亡越月姑亦

亡貧難孤苦二喪並舉爲典衣以送之有以微言  
諷之者氏即號泣曰吾父業儒吾夫亦業儒清白  
婦女何得以汙言相及乎遂嚙指誓無他志事繼  
姑如禮內外以孝節稱事聞詔旌其門  
刁氏慈人朱明妻明卒刁年二十餘遺孤三歲窶  
貧無依父母憫而計之刁矢志自勵屏去服飾甘  
淡泊勤紡績課子力學補邑弟子貢詔旌其門  
應氏奉化王綬妻年十八歸綬綬亡應年二十五  
時方娠綬疾革指其腹訣曰幸生男汝能撫育以



續吾後吾願足矣言畢而沒應號慟絕而復甦閱  
月生子訓含哀鞠育訓長延師督教居常紡績自  
給茹薶衣素以苦節自勵年八十餘卒嘉靖十二  
年詔旌其門

茅氏慈邑庠生張聖妻七月而聖卒茅痛哭嘔血  
以頭觸棺幾絕及葬令穿二壙將掩棺大哭以什  
諸姊強扶以歸遂致哀終身有疾不迎醫雖諸從  
子亦罕見見亦不踰閫也

楊氏張葩妻鄞人年十九而嫁嫁七日而寡乃遂  
以死自誓不易其志諸伯氏欲圖其產以訛言相  
誣終不爲動白首一節人無間言

王氏慈邑儒馮栢妻栢故王年二十五遺孤方七  
月忍死育孤誓不奪志奉舅姑孝敬不衰每夫諱  
日未嘗不痛泣隣屢被火及氏寢室即滅人以為  
節孝所感云

胡氏奉化縣學生王溥妻年二十一溥卒父母欲  
令他圖即籲天自誓以從子訓爲嗣閉門紡績孝  
養舅姑未嘗少懈從子誥第進士欲乞旌表胡止



之曰守節分也何以旌爲年七十九而卒

阮氏奉化王紡妻年二十七紡卒阮號哭幾絕母憫之百計說誘終無他志夫兄利其貲又強之不可遂盡以阮田園鬻諸人使無所衣食以困之阮亦不與爭但躬織紉甘淡薄忍饑寒苦節益厲非舅姑祭祀未嘗踰閭閻年七十四而卒

王氏諱一芝定海右族女也歸慈谿減梁甫三月而梁之父任三年不歸已而舅死官所梁扶喪歸亦死王年方十九手治服殮旣殯號哭別塚以歸

一日促父往視梁墓及還見閨牕扃固驚呼不應啓視之則已經矣事聞詔旌其門

張氏許聘慈庠生鄭煥煥已嬰疾而求成嘉禮父母不可張泣請曰業已許鄭矣脩短不可知柰何弗與一見乎父母感其言歸之即侍湯藥信宿煥卒撫棺擗踊號泣自是獨處一室躬朴素執女工歲時享祀不踰閭年八十一而終有司奏旌其門林氏張邦彥妻勤人其夫以視其弟檢討邦奇上京師道病卒林年二十六而寡哀毀異常即父遠



寧波府志卷四十一  
三十一  
遇忌日猶慟哭幾死人憐其無子有勸之自逸者  
曰舅姑在堂叔氏遠宦米鹽細事將誰委乎乃日  
執烹飪治酒漿夙興夜寐孝養二親不衰年踰六  
十而終貞白如一日詔旌其門

楊氏慈谿人葉桂妻桂蚤卒時楊年二十三得子  
煒甫七月舅亦客死惟老姑在堂楊上承下撫畢  
力以濟煒既長娶婦甫有孫而婦卒葉素窶棘死  
喪相仍不絕如綫而楊爲撫其遺孤卒以綿其宗  
祀有司奏旌其門

姚氏慈谿人喪其夫馮廉纔二十七歲貞志終身  
未嘗見齒教其子材爲名彥士縣尹鄧熺奏旌其  
門

葉氏定海人許聘慈谿翁氏幼失父母歸翁育之  
年十四翁貲產日落且失其姑舅待之如奴勞肆  
萬狀無怨色一日舅以子未長室可少緩欲鬻之  
羅姓者葉聞恚曰我非貨也焉得輾轉貿易連日  
泣下旣知不可免僞爲喜色若將從舅命舅遂寬  
之適夜月明給妯娒曰月色甚佳盍少夷猶乎適



寧波府志卷四  
三十四  
門外有人依違而入久之妯娌止之曰夜幾半矣  
盍就寢乎應曰諾翌晨門啓覓氏已浮屍於河起  
之色如生其衣服上下聯結甚固時暑方熾而不  
腐人皆異之

吳氏鄞人進士吳仲賢孫適屠漢年二十生子備  
未週漢死氏哀毀踰禮家故貧茹苦力作以供其  
姑姑病露禱願以身代姑愈人稱爲節孝云嘉靖  
間有司奏旌其門

王氏慈人歸方氏嘉靖戊戌正月二十八日夜半  
火起市西延熾及方王歸僅逾月居一小樓時夫  
外出堅守不下遂陷於火徧體灼燼惟心獨存其  
夫見之輒化鄉先生劉世龍爲作怨歌行以哀之  
劉氏名淑清鄞人年二十歸王相相舉進士爲翰  
林編修死于諫劉檢其遺囊獨圖書一匣扶櫬歸  
極力營葬未幾而遺孤又死乃子其從子含哀茹  
辛躬御紡績以供舅姑已而舅姑相繼沒則傾貲  
治喪具無貽後悔娶居三十餘年雖外內戚屬鮮  
有得面者昕夕紡績耄猶弗衰



張氏名潤玉鄞人趙瑞之妻生子龍甫四朞而瑞死家故涼至是益落舅姑垂白諸孤稚日嗷嗷待哺親黨咸謂不支張獨茹荼攻苦躬紡織以給俯仰竟以死足跡不踰閩語不出聲舅姑繼沒乃治棺歛含晝夜哭無已子龍長擇師教導今爲邑庠士云龍妻孫氏孝養孀姑力女工以供至翦髮鬻而充之竟以疲瘵死人以一門節孝稱之

林氏鄞陽堂鄉李八妻也八故山農傭乞生子性三甫週而八死林年二十八躡踊哭泣若不能生旣葬或憐而說之改醮林曰生爲李氏婦死則李氏鬼耳已而性三長娶婦丘氏舉一孫而性三死丘即他適林抱育遺孤紡績以自給未嘗幾微愁苦見顏面人尤難之

金氏鄞贈通判金潛女年十六歸王淮時淮父以疾終殯於堂堂灾金伏棺慟哭風返火熄棺乃全踰年淮客死吳中喪歸金哀泣墮地終喪所親或試以微言輒以栢舟自誓勤女紅以養其姑不怠姑疾朝夕侍湯藥雖穢惡不厭比死脫簪珥葬焉



守節四十餘年如一日有司奏旌其門

韓氏鄞人年十七歸葑里陳淳夫隨父任道亡時韓年二十二撫三歲孤兒培堅貞苦節閉門不出絕不與人言笑身不衣華綵專事紡績三十餘年奏旌其門

余氏岐山余文之女適鄞毛恕恕卒婦年二十四一子寔方四歲誓死不移伯叔逼之嫁終不聽鞠寔有成以能膽爲教年八十而終

胡氏鄞許元忱妻元忱爲徐祝師養子習巫祝事

氏竊鄙之勸忱改業身勤織作別治曾導忱漁以供翁媪皆宜之然時時慮元忱故許氏不能有徐氏室也令稍稍橐資樹許宗僅成田廬未返室而元忱病疫死氏才二十三呼天自誓告徐乞殯其夫許氏廬而身自苦臥柩旁持一刀惺惺達曙時號呼泣即所居無戶牖蔽而日礪其刀自壯聞者驚動未幾其夫之兄及徐師亦相繼疫死妣遽改適而徐媪老亦不能爲氏植里人妍氏色競媒於許之強暴者求偶氏有期矣氏見逼即毀兩臉截



鬢髮斷左手三指血淋漓大詬罵誓必死羣暴者驚散去族尊姑媪妯皆抱持氏大慟因立應後者令子之子年相近氏甚嚴之督之力田唯唯聽氏益身自勞苦慰育備至喪三年不浣不櫛故污穢自廢極力結同穴畢夫葬乃娶婦纔潔布素爲具脩見族之禮明日始復爲具脩其婦見族之禮曰非是無以爲許氏婦也夫有弟少流移則復爲反之日道之勤弗率即延尊者詬責之已而復爲之娶嚴之如姑婦伯氏有遺孤在他姓歲致衣履期保全之已而皆絕氏益痛含淚織作僅僅免饑凍而耿耿之性死不可易云

邵氏爲慈谿邑劉瑩配未及三年而瑩卒邵以節自守始終無間言嘉靖間奏表其閭

王氏慈邑諸生秦璽配璽卒王甚少遺二幼孤父母欲奪其志王抱孤大慟以死自誓竟教其子有成嘉靖間奏表其門

陳氏鄞舉人董銓妻銓上禮部試道卒陳氏年二十六聞訃痛幾絕日纍纍抱遺孤悲不勝已而遺



腹復生子淑則頗慰曰獨根不任齧蠶吾今乃復得此兒也則含哀教二子勞瘁憤鬱百爾備嘗竟全其身節

丘氏王憲維妻象山人嘉靖丁未四月漳賊登劫西山王姓時夜分賊入丘氏室見其美欲污之丘不從執木棍擊之中賊首賊以刃刺其腹而死

丁氏年十七歸寧波衛百戶賈錠未幾錠以轉漕赴京道卒丁聞一哭而隕家人扶灌移時乃甦日哀哀哭淚盡繼之以血數欲自縊且溺家人密防

之不遂乃撫前妻之子文榮圖爲植樹其叔氏潛謀欲奪其志丁曰妾未亡人也幸有子將勉育之成嗣世勲綿賈氏而乃欲翦之乎即引刀斷其指叔氏喘不敢吐氣丁益自操勵廢膏沐絕華綺目不窺于戶一日火燎其宇仰天告哀旋即息滅里人驚異之年六十九忽沐浴更衣而逝

王氏鄞人歸夏冕年二十三而寡遺孤二人俱在襁褓氏呼天大慟矢志無他姑老齒髮俱落朝夕敬事或以其乳乳之二孤漸長朝夕訓厲不懈氏



寧波府志卷四  
始歸夏夫與兄弟已析氏言曰夫子儒流也獨不識田荆之義乎夫感其言遂合居如初嘉靖丙辰倭寇卒至男子盡出捍護氏乃負姑入山披棘破膚姑賴以全比遘疾悉營其姑喪葬之事泣涕而卒

周氏名景象山人年十九適生員俞訓甫育二子而夫亡時子少家日落幾不能自存景日抱孤以泣曰未亡人即寒餓有死而已以織紉自養勞苦萬狀未嘗有戚容課子業儒迄於有成卒年八十

有二

桂阿寶女姜阿龍妻慈谿人方少艾嘉靖丙辰倭賊至婦與衆婦俱走匿馮氏僻室室後有池賊搜室衆婦俱赴於池賊以手援之獨婦力絕其袂竟溺不起

沈氏六節沈思橋界觀海鳴鶴之間家衆二千人多驍黠善鬪自嘉靖來海上多事寇上烏山燬鳴鶴縱橫蹂躪沈氏不惟自衛且能殲其渠魁奪其所掠賊甚讐之丙辰夏賊乃大至沈氏豪誓於衆



曰無出婦女無輦貨財誓以死守不然者先戮之  
有章氏者誓於內曰男子死鬪婦女當死義辱與  
死等耳衆婦皆爲竦聽旣賊圍合羣婦聚於一樓  
賊散入戶章氏遽出投於河周氏馮氏繼之共死  
一所柴氏方爲夫礪刃賊已斫戶入矣柴即以刃  
斫賊旋自刃孟氏孫氏姒娣爲賊所得相抱持不  
放共詈賊奪刀自刺皆殲焉思橋之難沈宗婦死  
難者三十餘其尤烈者此六人也章氏沈柞妻周  
氏沈希曾妻馮氏沈信魁妻柴氏沈惟瑞妻孟氏

沈弘量妻孫氏沈琳妻

茅氏女慈人年十四父母亡獨與兄嫂居其兄痿  
臥丙辰寇入縣嫂出奔呼之行女曰吾爲室女去  
將安之俱去誰爲扶吾兄者賊至遽縱火女力扶  
其兄避於空室俱被燔灼而死二屍相變縮焉

張氏慈谿馮警妻唐孝子張無擇之後年二十歸  
於警纔六年嘉靖丙辰四月遇倭寇之變邑治焚  
燹張氏偕孤竄匿其夫相失遂死於寇張哀號亟  
收夫屍殮葬未數日寇復至張偕姑及妯娌買舟



三五六  
逃至管山江復爲寇所及張知不免曰不死且污賊手然馮之嗣不可絕也即以幼子付其姑偕伯之妾徐氏沉於江賊大驚異遂捨舟中諸婦以去三日屍浮於江家人取而合葬於夫之墓

陳氏竺欽妻奉化人嘉靖三十四年五月二十八日倭夷入奉化陳年少艾携姑及女而逃至徐家渡橋倭追甚逼陳自度不得脫言於姑曰辱而生寧不辱而死遂令夫負其姑自抱女投水而死傳烈女者定海昌國傅梓女也年甫十七美姿色

未字嘉靖三十五年丙辰五月間夷寇至自倉卒女家故瀕海遂爲賊所得女即以石自破其面流血塗地賊怒磔之後二年甲寅而有烈婦李氏氏爲張棟妻夷寇執氏欲污之氏罵賊不屈竟死賊亦知縣宋繼祖先後上于軍門爲禮葬焉先是二十九年爲歲庚戌有葉小九妻嚴氏者爲漳賊所執驅之而前氏知不免遂投河而死監司遣官禮祀之

姜氏

俞氏

二烈婦事見孝子王應麒傳中



張氏呂瑛妻鄞人年二十四瑛死貧甚不能堪誓不改適撫遺孤有立八十餘卒有司上其事詔旌其門

陳氏鄞人紀鱗妻鱗病癩不可近陳極力護療之一無所嫌竟不起陳年二十七無子哀慟屢絕矢志不渝力勤紡績孝養舅姑撫其繼子清教育備至卒以節終

陳氏鄞人章海妻年二十四而夫亡越三日產一女初姑鍾氏欲季子之專其資也連奪二長婦之

志次將及陳海上葬姑囑營單穴陳截髮嚙指矢死靡他悉捐奩具以營雙穴宗人知不可奪立姪應岐爲後去膏沐合苦茹淡勤紡績以養姑撫教男女咸有禮法冰檠之操終始無二

蔡氏鄞人沈渭妻年十九歸於渭南數月渭父以赴選之京蔡謂其夫曰翁老遠行君當隨侍弗以新婚睽孝養也渭從其言是歲生子應麟明年而渭死蔡一哭輒什逾時始甦事舅姑修灑洗腆屢遭齟齬處之裕如至欲奪其志輒抱子而泣矢志



自勵人無間言

司馬氏曰古者女有師氏理陰教以章明婦順少  
長貴賤習於姆訓故詩書所稱列女事彰彰顯矣  
逮及叔季內教廢弛婦人女子生長閨闈無所師  
程矧性秉陰柔至死生事宜不能烈烈以殉顧乃  
以疏節奇行表見於時可異也嘗謂男子事問學  
澤於師友猶或墮昧於板蕩顛沛之際謂可多望  
之於女婦乎吾寧自冀國而下凡若干人若童八  
娘脫王母於虎口以自殘趙大娘存三世之孤以  
卒老尚書王來母氏惓惓以忠誠訓其子及諸賢  
淑臨難不辱甘心鋒刃水火以抗不二之義炳然  
大節有烈丈夫所難能彼其心誠忠信可質於神  
明謂不足以潤彤管光簡策哉

續錄

禹氏名淑靜會稽人嫁爲四明吳守正妻事舅姑  
以孝聞每事必咨稟其夫而後行言必由禮義女  
婦有不飭者絕不與接至正壬辰錢唐陷于賊移  
家崇德之石門賊又陷崇德携其女汎舟以避明



日賊退苗軍大掠不得脫禹氏即抱八歲幼女投水死日暮其夫覓于死所得幼女屍即其旁求之禹氏屍挺然立水中學士王禕爲立傳云

徐氏名妙梓象山人歸同里陳汝祺事舅姑盡婦道大德丁未歲大侵人相食徐氏盡出奩具易粟以養或采蕨根薺菜以取給厥後舅姑沒停柩于家隣舍火衆爭携筐篚以避徐氏與夫以身捍柩呼天慟哭誓與俱焚火且及左右曳使避不動俄而返風轉火卒全其柩人以孝婦稱之

陳氏名守真世明人歸定海樂氏閱五歲夫亡而姑老子幼陳氏自誓不負夫托竭力養姑爲諸婦先姑亡悉出餘裝以畢喪葬延明師教其二子長曰友業儒次曰彥業醫皆有成立

陳氏名勝可鄞人歸同里吳景仁讀書通大義其舅伯英初食祿官府國初例徙居濠梁夫當侍行謂婦曰相見未卜吾母在堂幸竭力奉養汝乳下之兒腹中之姪宜善爲計無絕吾後婦曰不敢不力既而又生一子於是養姑鞠子靡所不至比



其弟卒復迎養父母如養姑然又具裝嫁二女弟  
姑沒賣首飾以襄葬事歲致資費於舅者不絕及  
舅與夫沒相繼訃報婦慟絕復蘇夫叔伯雄壓死  
旅舍家遠無子爲之殯歛立几筵朝夕哭奠二子  
稍長延師教勗學業有成俱爲郡庠弟子

柯氏名勝瓊定海人年二十歸鄞丘原和及三年  
生子友甫期而原和卒婦抱隱啣恤蚕繰紡績養  
老育幼日夜弗休父母閔而喻意婦曰夫不幸歛  
恨死矣所不敢遽相從於地下者以夫父母弱息  
托於勝瓊耳如背而之他又將誰托乎且不義之  
事雖子處猶不可况所托老弱在乎日月照臨有  
死而已卒以米糲自持舅姑沒喪葬如禮友稍長  
訓之讀書以善行稱



寧波府志卷四十終

寧波府志卷四十一 傳十七

南京兵部尚書郡人張時徹纂修

寧波府知府蜀威遠周希哲訂正

特藝

宋臧中立毘陵人元豐間客鄞南湖時抱病求療者日數十人中立診治如神崇寧中徽宗后病甚詔求良醫中立應詔以布衣麻履見上命之入診出而問曰卿診得何証中立對曰臣所診脾脉極虛殆嘔泄之疾作楚和藥以進且曰服此得睡為



效至夜半果思粥食不一月獲安賜歸詔出官帑  
市地築室南湖以居焉因名迎鳳坊

奉真善醫熙寧中名聞於東都天章閣待制許元  
為江淮發運使奏課於京師時欲入對而其子疾  
亟瞑而不食惛惛欲死逾宿矣使奉真視之曰脾  
已絕不可治死在明日元曰固然今方有事須陛  
對能延數日否奉真曰此可為也諸臟已衰唯肝  
臟獨過脾為肝勝其氣先絕絕則死若急瀉肝氣  
令衰則脾少緩可延三日過此無術也乃投之藥

至晚遂能張目稍稍啜粥明日漸蘇元極喜奉真  
笑曰此不足喜肝氣漸舒耳無能為也越三日果  
卒奉真之為醫也其診視之妙不差銖分其法傳  
之元覺元覺傳之法琮及了初皆能續其術馳聲  
一時

國朝呂復字玄英號滄州翁先河東人徙鄞因家  
焉復幼孤貧依母氏讀易書習詞賦後以母病攻  
岐黃術一日過三衢鄭禮于逆旅中授以古先禁  
方及色脉藥論諸書歷試有驗浙省平章左答納



寧波府志卷五  
三百二十三  
失里在帥闔病無寐心悸神懾如處孤壘而四面受敵雖堅臥密室睫未嘗交也召復胗云左關之陽浮而虛察其色少陽之支外溢於目膽虛而風乘以入故無寐因投禁方烏梅湯抱膽丸日再服遂熟睡比寤病如脫其神效類如此

徐詵字和仲先錢塘人後父宦遊四明遂家焉詵性謹厚居家篤學以春秋經教授鄉里出講下者多繩繩有師法爲文章不俚不浮洪武間三日果成祖在潛邸以能琴召錫賚殊厚旣歸舉明經爲

邑庠訓導二十七年例賜冠帶卒于官詵自曾祖逮其父皆以琴專門而詵尤妙得手應心趣自天成時遊江湖大爲知音者推讓有薛生者不知何郡人善琴操烏夜啼號薛烏夜每請和竹鼓之弗許薛求好事者邀和仲爲鼓此曲薛生隔壁潛聽旣已趨出拜伏几下曰願爲弟子幸不虛此生以故稱徐門琴曰浙操所製有文王思舜操凡經訂正者號爲神品曰梅雪窩刪潤譜同里若王禮金應隆吳以介親受業其門而遠近從學者衆後子



孫皆能踵其家學

樓得達 鄞人性尚閒雅博於文藝於奕則稱專門  
永樂初驛召至京偕江陰相子先入覲子先自謂  
天下無敵手視得達蔑如也 上命二人對奕顧  
中貴官密取紙畫冠帶置局下得達累奕累勝遂  
啓而視之命吏部給冠帶

陸昂字季高始居會稽遷於鄞自幼習舉進士業  
凡經史百家翰墨無不旁搜博覽性剛方與人寡  
合已而父病遂棄其業攻岐黃書以醫自給周旋

調護親獲耆年聲名大著叩者如市永樂初辟至  
京師預修蘭臺金匱玄機素要書

袁廷玉名珙以字行號柳莊其先南昌人也五世  
祖子誠知臨安府以事至鄞因家焉父寧老元翰  
林檢閱廷玉生而爽秀目光如電嘗遊東海補陀  
洛伽山遇異僧別古崖善相一見大奇之曰法當  
以術顯因試令仰視赤日兩目盡眩後入辨暗室  
赤黑荳又令月夜隔牕辨五綵線皆不爽遂悉其  
術授之且曰子後當出我右已又受相術於奉化



吳國才 成祖龍潛時邑人金忠當戍趙州携妻以行忠窶甚妻哭於市廷玉聞其聲驚曰此貴夫人也因相忠必大貴饋之贖且曰自今皆通衢可無憂也得志無相忘已而忠附商舟商適失囊金忠以六壬課占之曰金當於某水涯得之果如其言商遂厚資之抵戍已而至燕賣卜有名 成祖疾召忠卜之得鑄印乘軒之卦曰此富貴不可言何疾之憂居嘗命卜大見寵異忠遂薦廷玉密召至邸肆未見 上雜衛士類已者數人就肆中羣

飲陰試之廷玉一見即跪曰殿下何輕行乃爾上遽以他言溷之還宮召見廷玉曰龍行虎步日角插天太平天子也俟鬚及臍即登極矣比鬚及臍遂靖內難官廷玉太常寺丞而金忠亦爲兵部尚書忠術不盡傳而廷玉術人至今神之其法常於夜二鼓或五鼓人神澄氣定張炬而燭之以其形狀氣色叅之生年配之五行定其禍福如合符契其貌人必望而得其心善必吉惡必凶恒反覆化導俾避禍以集福一時達官貴人爭求鑒焉然



未嘗言及其私其尤異者如相張啓源曰公山根赤色浮見二日內當有火家果燬質明復曰火氣猶未退啓源猥曰吾家一夕已盡又何火邪俄而其別業復焚相南臺普花帖木兒曰公神氣嚴肅大貴驗也但印堂司空有赤氣遷除百四十日當奪印然守正秉忠名必不朽願勉之普果晉署臺事於越未幾張太尉逼奪其印抗節而死相副使程徐曰君帝座黃紫氣見三年內有二美除但冷笑無情非忠節相也二年果拜兵侍陞尚書後歸歎復爲吏侍云又相劉仁本清中有濁張啓源濁中有清及王楠鄭文寶曰四公不十年當二品但晚節不令終其後俱得樞密分院顯官改物後啓源文寶見戮仁本死獄中楠亦貶死相中丞月魯不花曰公面有紫赤氣如玉印紋除拜象也當有中臺之命然紫赤火也不宜北北水位也往必不祥果拜中臺泛海北上死于倭寇妻奴從焉相陶凱曰五岳朝揖而氣色未開五星分明而光澤未見宜藏器待時不十年以文進爲異代臣以二品



顯名荆揚間凱果於內附之初爲禮部尚書湖廣  
叅政相洪珏面方如田富貴相也但妻位氣清主  
損兩配生平多心術長子必見刺貶洪後有田五  
十頃官至省員外兼理問一妻死其一妻黜也長  
子刺屯遠地順天尹王驥疾甚延而叩之神色已  
變乃請相其夫人曰此一品命婦也公必不死後  
驥果愈以麓川功封靖遠伯相方明鞏曰父喪而  
官顯後其父死事鞏襲爵官分省左丞其他因前  
參後由得論失或以親屬相徵應傳聞籍籍別有

記載不能殫述云子忠徹生亦異常少業其父術  
事成祖官尚寶少卿扈從北征刻期取驗一日  
諫師出東道弗利上弗允不見虜而還仁宗  
朝宗室有謀不軌者事未覺忠徹望氣知之七日  
高煦以反報嘗語方伯白圭曰王中丞文面無人  
色法曰瀝血頭于尚書謙目常上視法曰望刀眼  
非令終相也已而皆驗其精鑒不異於父云  
司馬氏曰人言堯眉八采舜目重瞳帝王之興厥  
有異哉故呂公效妃於沛公天綱稱異於天策飛



龍出潛則高雲祥霧爲之先徵焉珙奏休文皇  
用蒸龍會蓋是時靖難之計神啓其祥矣珙亦適  
際其逢因而赴之殆與田間老父談奇說貴卒隱  
不見用以徵異者哉其所論列諸人生死富貴大  
都比之唐舉之謬蔡澤管輅之藐曹爽前史所載  
不可盡廢豈品庶馮生明者先睹其微乎然而裴  
相以還帶免餓宋郊以活蟻顯名命乃在天亦由  
人反珙每以心善惡轉人禍福有以哉  
吳國才奉化白巖人悉心唐舉之術言屢巧中遠

游歸訪縣故舊不在其孫開肆乃索紙筆爲書緘  
留而去祖歸孫曰頃有吳叟留書曰此吳國才先  
生也丰鑿最妙又遊始回相汝色汝婦有粉骨碎  
身之灾其慎之及期俾婦晏坐新室竟日不出抵  
暮食既至厨啓檻取水虎爪之入山以食門人表  
廷玉嘗侍 太宗皇帝一日問其所與以國才對  
遣使召至試之果然將寵錫以官國才以福薄辭  
果卒

**胡宏**鄞人善易筮天順間寧波太守陸阜邀至官



舍適阜出阜子哀為父怒其學不進懼不敢見聞  
宏至急請筮之宏曰尊君侯未占公子不可先日  
事亟矣曰宜隨意出示一物哀出一錢曰占家庭  
口舌何日可解曰即日解已而阜歸夫人迎言宏  
果靈及哀占故呼問其詳遂忘所怒翌日為阜筮  
得豐之明夷斷曰逢劉則滯遇馮則止頃之同知  
劉文顯至與阜大忤屢欲攘臂奮擊明年海道副  
使馮靖劾阜倉糧不給軍餉謫戍廣西其神驗類  
如此著筮書曰黃金尺

王坡鄞人病瞽善六壬兼釋易繇至武林有驛傍  
人占家宅坡云今年四月十三日當雷震堂棟不  
傷人後果然鄞斷塘有一祠初塑神像成鄉人托  
以人名占之坡曰此人如木偶難逃水火越朞果  
為惡少投于江隨潮上下後復碎而燬之按察司  
僉事黃譽性嚴重人莫敢近招坡筮之坡曰似得  
鬼責公前歸時失展先大夫墓有陰譴黃下淚曰  
然坡曰明年當轉官在本省藩職後果然尋卒  
倪光字應奎鄞人少受易為舉子業已又感土木



事復兼讀孫吳講擊劔之術毅然有古結客取河西之志然時時沈玩先天忽朗然內覺若有神授自知不良於功名遂悉棄去觀消息盈虛輒能前知偶過日者胡氏肆見招牌懸湖田二字因占之曰田者墓田象也胡立水旁而從墓田其必以酒溺乎後胡氏果醉墮水死遨遊兩京名動諸公卿皆爭致說易一日在鏡川楊公所忽中貴使至光見一雀自庭樹集於地已復還集樹即謂其使曰汝來得非失馬乎六日當復使大驚鏡川因問故光曰雀踊躍物也去樹而集於地舍所依也已還集樹復歸其所也其集樹也自北而南水數六也故曰馬失而六日復因復問馬色光曰以北水尅南火當黃而近於黑皆悉驗諸公神其術咸以小康節呼之後閣老萬公安欲薦官之光遽辭歸旅宿臨清中夜聞扣戶聲棘而辭哀光厲聲曰汝作反將丐生邪其人吐實光謾曰南北東西皆汝路也旦起市已獲盜家時壻知縣楊琦以諸生赴省試辭光光汲井因曰寒泉食矣都憲王應鵬少至



光家光奇之問得莊字光曰莊子開卷說鯤化其應鵬必九萬里乎以楊氏甥妻之張都憲楷聞有南都之命其子露曉叩之光時收畫遽迎門謂曰君翁將起用被恩露必南都然不久而收有產子者至而傘裂其人失色光曰傘裂而小人見汝細君已育子可喜矣其前知類多如此平生不以殖產爲事所獲即散之人日偕洪兵部常金太僕湜嚴兵部端宗憲部佑及散人李端王政爲社會賦詩爲樂有清風明月推簾戶只恐詩人佇立敲之句年八十生而舉殯擬淵明自祭杜牧志墓事懸像設奠延慶寺爲詩自挽羣公屬和金太僕別畫竹題詩爲壽有舉世稱高士關天合少微之句曰先生舉殯吾爲寫真其達生委命如此人皆稱爲味易先生所著有味易詩集凡十二卷

胡廷鉉奉化匯溪人字公惠少學歐陽詢書法洪武初召至京師上命詹孟舉廷鉉各寫千文一本以進上覽之廷鉉書法過孟舉遂令書皇陵碑道勁可嘉授中書舍人永樂間鄞楊尹銘亦以



楷書進歷官中書舍人小篆師周伯琦若甫東張  
景善詩文而小楷行草師鍾王各名于時

徐蘭字芳遠號南塘其先餘姚人後徙鄞爲郡諸  
生累舉不第棄去遂潛心書法正書師鍾繇宣示  
表行草師王獻之授衣天寶節過鵞還等帖皆淳  
古遒度越流俗尤精六書考究點畫正其訛謬  
作古文奇字得邊魯生筆法八分初法蔡邕淳于  
長碑不失矩度而晚年參以己意時人謂其書與  
程南雲並馳遠近求者無虛日蘭亦高自矜負間  
有挾勢位使輿隸致之輒白眼叱去曰吾豈祇役  
者邪人以是益重之

詹僖字仲和號鐵冠道人鄞人初爲縣諸生已而  
棄去學書師王右軍樂毅論東方朔贊及趙子昂  
度人經金丹四百字七觀焦君碣諸帖皆逼真年  
七十餘燈下作小楷如蠅頭狀遒勁可法父復禮  
故善書僖寔過之兩京俱有碑刻人皆珍焉僖名  
動公卿而亢潔自好終不屑丐一官人以是益高  
之



呂紀字廷振號樂愚鄞人風神秀雅精於藻繪時綴小詩其上初學邊景昭花鳥袁忠徹見之謂出景昭上館於家使臨唐宋以來名畫遂入妙品獨步當代嘗戲畫雌雞壁間而生雄谷谷統其側弗去殆古點精敲板之流 孝廟時召至京師官錦衣衛指揮同知紀爲人謹禮法敦信義縉紳多重之其在畫院凡應詔承制多立意進規主孝皇稱之曰工執藝事以諫呂紀有焉比病存問絡繹自言曰渥恩難勝吾其死矣果卒

王養蒙鄞人畫蒲萄障乘醉着新草履漬墨亂步絹上就以爲葉布藤綴實天趣自然 趙九成鄞人初爲郡學諸生時有學師督過諸生故太早升堂重收夏楚之威擊蒙不堪矣羣生譁然一日或穢其公座弄之而九成素滑稽寡檢束誦憲九成爲之遂陰中之督學見黜九成被誣去以棋遊京師盡一時棋士對局皆屈焉 孝宗御燕殿召九成試之果壓流輩所行筭多出古棋譜外 上曰真國手也命官鴻臚序班供御其後乃



有范洪曰真國手也  
范洪字元博全癡其別號也世居鄆城之南生而  
穎異賦性清介幼習舉子業試有司數奇不偶尋  
棄去遂有高世之志奕棋以自娛嘗曰吾何用殖  
貲樹業齷齪若東海鄙人爲哉於是挾技遊京  
師時西涯李公邃菴楊公白巖喬公當朝每延  
致對局歡洽竟日無惰容隨其人高下與之對不  
求大勝然終其身不一挫衄遂以國手名時人列  
之四絕然三公爲當世尊官遇洪極隆而洪亦不

爲之脂韋以故敬禮尤甚

四絕謂金忠十表洪相呂紀畫并洪奕云

張德輝字秋瞻號雲巢老人世居慈谿大寶山麓  
少學寫龍自得其趣每遇天陰將雨登舍後絕頂  
盤薄以雲氣騰湧默與神會晚年烘染有法而飛  
雲驚電變化萬狀或累日不下一筆或一日連寫  
數幅極於神妙可追踪陳所翁今神祠梵宇古壁  
尚存其遺跡

朱自方號夢菴先臨江人後宦遊奉化遂占籍焉  
自方性尚冲澹喜寫水墨山水晚年出入郭熙范



寬而自成一家在鄞則有胡仲厚吳景行之青綠山水師董源而雲氣悠揚可愛然亦自秘惜人罕得之他如史均民之水仙傅子英之模寫人物各有生意數人出處不同皆一時之傑也

**卓迪**字民逸奉化松溪人善寫水墨山水嘗師朱自方得其心妙而筆法精緻實過馬永樂中召至京師兼以篆隸入翰林將授官而卒南京報恩寺湧壁有民逸筆云

**王貴**字天爵浦口人以星術聞 憲宗朝授鴻臚

寺序班

**王諤**字廷直奉化西街人嘗師里人蕭鳳盡其術乃肆力於唐宋以來名家凡奇山怪石古木驚湍之類盡摹其妙 孝宗朝大承寵幸時 上好馬遠畫亟稱曰王諤今之馬遠也 武宗朝傳奉錦衣千戶欽賜圖書花帶白金文鏹後以疾乞歸終于家其同邑盧鎮嘗師諤亦稱絕藝

**錢仲**字子仲慈谿人善詩歌精篆籀學有李陽冰筆意嘗遊陸詹事深文待詔徵明之門得所贈詩



輒沽酒醉歌荅和或有餽遺即呼所知飲盡乃已  
既而遊京師無所遇困甚則戲標其所寓舍曰詩  
文出賣適許翰林成名過之笑曰京師故多市貨  
可買賣而乃有詩文賣者邪輒召問曰吾欲爲汝  
買詩仲應題口占立就清新雅緻大見稱賞嘉靖  
戊子應六書試桂冢宰薨命作治河說及秋興八  
首跋仲居首選發史館修錄大學衍義書成授中  
書舍人

書舍人

司馬氏曰自臧中立至錢仲凡二十二人以醫名

者四以畫名者六以書名者三以奕名者三以琴  
若數若卜名者各一以相名者袁氏父子與吳國  
才亦三袁氏余既論著矣嘗疑金忠之神於卜能  
使聖人舉大事無不中而不能自卜夫妻就戍道  
窶相泣也忠不自知而珙知之珙又不能自奮而  
忠卒薦珙曾不幾時際 聖人之興攀鱗附翼何  
其奇也嗟夫雲龍風虎殆有天意乎餘子瑣瑣本  
不足論然各以絕倫之技稱雄天下斯亦山川之  
降秀藝林之傑魁也



寧波府志卷四十一

寧波府志卷四十二

志傳十八

南京兵部尚書郡人張時徹纂修

寧波府知府蜀威遠周希哲訂正

仙釋

鄞

周鬼谷子姓王名詡西周人受道於老君入雲氣山採藥服之顏如童居清溪之鬼谷因以為號嘗遊鄞太白山南滄畧水簾洞有祠倚山臨水幽深聞寂人跡罕到真神仙之宅也晉郭璞有詩云清



溪千餘仞中有一道士雲生梁棟間風吹窻牖裏  
借問此何誰云是鬼谷子祠存陽堂鄉

吳劉綱字伯經下邳人初居四明山後爲上虞令  
師事白君歷年道成會親故飲食畢登大皂莢木  
上去地十餘丈舉手而別忽飛入雲中妻樊夫人  
亦有道術俱昇天今白水觀乃其遺跡云

晉鮑蓋其先東漢鄆邑人也其父隱邑之青山無  
嗣日籲天以請其母晝寢夢吞日而孕凡三歲當  
晉太始三年九月十五日乃生祥光燭室遂名曰

圓照後復名蓋容貌英偉美鬚髯樂善好施任俠  
尚氣節嘗爲縣吏俾奉牒入京留家酣飲踰月不  
行縣方詰責已而得報章覈之果上達妻方氏生  
一子絕肖蓋嘗射石沒鏃解海龍之戰皆其異也  
建興四年七月十五日醉終于家後三十年夢告  
其子曰我當再生其啓我棺子以告母次夕方氏  
夢亦如之乃謀諸故老遂啓視之屍顏色如生衣  
服潤潔若朝夕常御者塚四角明燈爛然衆皆異  
焉已而祥雲下迎乘之上昇遠近傳聞莫不驚駭



塚間得寶鼎非金非石上有篆文曰東海之寶未  
和中穆帝遣使求之將納內藏褚太后曰此神物  
也遂封還且許立祠初廟於青山至唐聖曆中復  
廟于城中即今靈應廟是也胡澄爲之碑具載廟  
下

唐正覺姓李氏隰州人年十四受戒具後學于丹  
霞淳禪師向子譚漕淮南器重之主泗州普照建  
炎間主天童金人犯明諸寺皆燬獨覺危坐不去  
掠騎至塔嶺乃還寺僧舊不滿二百覺納衆千二

百人主事者憂之覺笑曰非汝所憂也翌日嘉禾  
錢氏致粟千斛歲大饑爲食貧民鑿萬工池有  
蜀僧叩覺密謂曰工徒甚繁願以乾丞相資遂以  
藥和水銀以器覆之貯湯缶上須臾有聲出之果  
銀也覺曰吾亦能之遂以永納口端坐逾時出之  
亦銀也僧愧謝去洞下宗旨以禎密納息絕視聽  
守心如嬰兒學者難之至覺爲再興其時宗杲主  
育王覺語杲曰明年當逝矣杲以辯說自高數侮  
覺至期覺屏絕人事者三月杲往送之至則已端



逝矣杲泣下爲之削髮舍利疑丹不可舉乃展拜  
曰平時自號善說法今不如師矣詔諡宏智禪師  
所著語錄行於世其文麗則如洞下宗旨云

普交鄞萬齡鄉畢氏之子幼穎悟未冠從釋初往  
錢塘南屏山聽天台教已乃造泐潭泐潭知其爲  
法器屢叩屢挫之交豁然有省呈偈曰有人問我  
解何宗一喝須教兩耳聾滿杓黃齏飽喫了生涯  
只在鉢盂中自是機辯迅發學徒爭歸之主天童  
山父之沐浴留偈辭衆而逝後七日開龕如生闍

維獲五色舍利忠肅公陳瓘嘗贊之曰拶破黃龍  
第四闕世人猶問生緣法其爲士大夫推重如此  
中書舍人黃公龜年爲作塔銘

唐心鏡禪師得愍空三昧黃巢至栖心寺師聞之  
語衆避去獨坐禪牀巢執刀問曰和尚爾見不睫  
眼殺人的將軍荅曰汝見不怕死的和尚巢舉刀  
向師師以指麾之刀落禪牀之角如是者三師大  
聲叱之巢不覺驚悸師偈云百萬貔貅入我家老  
僧不悟愍空華揮刀三下禪牀角只爲將軍眼見



花巢放刀禮拜乞度師云可往雪竇山度汝巢既去師曰呆子好殺不忌嘗謂須日月並明見雪則止今明州雪竇非彼死地邪巢果至雪竇死

**宋朱棣**字彥誠鄞人初本江南士子靖康初携家逃難行抵明越之界萬山嵯峨望一石室壁立千仞規舍其中忽有老父曰此聖公巖也神人居之上每有金鼓聲毒蛇猛獸守其窟不可往也棣曰吾止平地而遇寇必無幸者匿此中未必死於是棄檐持糲沿崖魚貫而進居旬有五日絕無可怖

者而岡嶺秀出泉石清泚真仙者所居望巖竇數有異光疑之因梯竹以上得一黑匣緘鏽甚固一劍橫其外啓之中有書與印言役鬼治病之術寇退奉之以去設壇而事之自是役鬼神如反掌最異者能追覓胗脉人有病妻則胗其夫父則胗其子有祟則以法治之無祟吞符亦安合沙鄭瓚嘗伺其作法往觀焉見其據案而坐運指於袖噴水於口以桺茹麾使而鬼神自至訊鞠論報若官府然問曰此何法也棣曰非法也周天大數也大衍



所謂成變化而行鬼神也成變化者數之方也行鬼神者數之圓也棣妻戴氏姪幼子神降于奉化張氏言上帝使續棣法某日則生戴亦夢一道士穎有珠曰上帝使爲而子代夫行法俄入于懷如期不血而生鄭瓚據其實記之

靈芝律師有戒行造五臺戒壇成忽一老人獻三珠來賀

智禮字約言金氏子居鄞之白塔巷自幼神情湛寂骨狀英粹始受戒具專探禪律從寶雲義通傳天台學曰法界自有次第若當奉持禮曰何謂法界僧曰大總法相圓融無碍是名法界禮曰既曰無碍次第安有居三年輒蒞講席咸平三年郡大旱與僧遵式燃指祈觀音誓曰果不雨當焚身三日雨大至撰不二門指要鈔及語難書天禧間修志華懺顯四淨土之道真宗賜號法智大師天台智者之學禮爲中興焉

介然從明智中立師居南湖燃指建十六觀與其徒誓曰念佛三昧往生要法也金人犯明州士庶



寧波府志卷四十二  
六  
奔散然獨守觀不去酋騎掠至叱曰汝不畏死邪  
然曰願力在是誠不忍去酋曰我北歸亦欲效此  
制作遂強挾以歸後人追思遂以其去日爲忌尊  
爲定慧尊者塑像于觀側

法忠萬齡鄉姚氏子也母初夢神僧託宿于家覺  
而有孕既生兩足有文若篆書木字父母奇之生  
不茹葷七歲出家依崇教院道英和尚博識強記  
諸部經論默究其義或笑其憨試以隱奧輒辯駁  
瀾翻旨趣超卓咸以忠虎子名之已而歷訪諸方

游南嶽卜築于妙高峯下有石如臥牛榜其居曰  
牧菴述宗教正心論十卷補寒山詩三百篇元談  
漁父並行於世最後在黃龍書頌曰六十六年遊  
夢幻中浩歌歸去撒手長空咄跏趺而逝塋寺東  
之香源洞平日持二木斧以接人於是同瘞焉號  
曰聯光之塔

善月字光遠號栢庭定海人母夢月入于懷後出  
家遂名善月蓋古佛名也居南湖問如來不斷性  
惡之論有省史太師以月波處之學者雲集居南



湖凡十三年後居上竺歲旱詔迎大士於明慶車  
駕親幸月以禱雨應補左街僧錄史忠獻問月曰  
欲何能斷荅曰日遠月忘或問以安心曰心本不  
動又問法華經藏曰當處全彰晚歲著論不輟有  
楞嚴玄覽金剛會解圓覺畧說楞伽通義等書天  
台之學月爲冠焉

智連字文秀姓杜氏鄞人學于圓照梵光嘗與宏  
智登千佛閣智曰聞四明講教言空中有相光曰  
誠然智以手指太虛曰本無一物其相安在連指

山川樓閣此諸物像復是何物智服其言後居南  
湖史太師與師游問曰師於禪律能貫通邪連曰  
冰泮雪消固一水耳又問華嚴般若何支離連曰  
支離所以爲簡易號覺靈師隆興元年十二月十  
八日逝明年正月太師生子彌遠將就蓐見連入  
室因名之曰覺老樓鑰評之曰心大而行密體卑  
而道尊恭而不勞博而不雜寂用之涯不可測也  
本如句章人初學於法智有悟爲頌曰處處逢路  
頭頭是故鄉本來成現事何必更思量法智肯



之講說教論從者如歸慶曆二年賜號神照嘗居白蓮寺有虎睡西南隅以杖擊之曰非汝所居虎俛首以去歿之夕所居梁棟折有聲著仁王懺儀趙清獻作行業碑

元照錢唐人自幼出家博究羣宗初居天台徙杭之東藏學徒爭從之復徙新城又愛餘姚之姜山

今屬鄞因駐錫焉法行益高凡禱雨輒應藥疫多效

所撰有資持記濟緣記行宗記應法記往法記報恩記及刪定尼戒本金剛疏之類尤工楷隸吟咏

得風騷體一日聞空中笙簫聲遂歸寂焉

本惠別號中峯杭州李氏出家天目山為僧曾往

日本傳教慶元間至寧波海會菴說法至治三年

募緣改菴為海會禪寺與攸州馮海粟相善海粟

一日訪僧擊門曰何人也海粟荅曰天下有名馮

海粟僧亦云世間難比老中峯後海粟作梅花詩

一百二十首欲以示僧海粟未至僧乃先置一火

爐於方丈海粟至而問曰時值炎月何故向火僧

荅曰公送臘詩故設此耳後授詩僧不展嗅而焚



寧波府志卷五十一  
五十一  
之海粟畧有愠色僧曰公弗嗔當還公之原詩即  
援筆而揮原詩一首亦和一首止和八十首海粟  
曰餘詩四十首不錄不和何也僧曰此令愛之作  
故不敢和海粟大駭手寫華嚴經塔一幅三年而  
成其字細如蠅頭縱橫成文寺僧寶之至今猶存  
食鉢一箇可容三斗凡食物必盡一鉢或數日不  
食後復歸天童山其詩在成化年間燬於火

啞女者莫詳其氏族亦不知何許人熙寧中見於  
鄞之戒香寺婉孌卍角年若及笄瘖不能言惟日  
持帚垂臂跣足晨粥午飯每拾菜滓餲餘啖人以  
爲顛騃歷人家預知吉凶以爲欣戚里士周錡學  
舉子業女屢至其家錡知其非常至則必延以蔬  
飯一日未及食忽起書偈於壁曰三界火宅衆苦  
具備報汝諸人求早出離後又造錡值錡趣裝將  
應舉女笑不止錡疑焉再三叩之遂索筆作長短句  
云風波未息虛名浮利終無益不如早去倍簑  
笠高臥煙霞千古企難及君今旣已裝行色定應  
鴈塔題名籍他年若到南雄驛玉石休分徒累卞



寧波府志四十一  
和泣鍰襲而藏之一日露臥鎮明嶺下或訶以不  
檢遽起歸寺長吁坐逝時三月三日也鍰爲具棺  
櫬瘞之柳亭後鍰見女于京師追問之不就歸發  
其瘞則空棺也後鍰果如南雄以言邊事忤時相  
入黨籍衛開客洛陽遇李士寧曰公鄉里啞女者  
過去維衛也子可歸禮之比歸已化開以不及見  
其生爲恨明年游錢塘寓書吏陳式家見羣兒數  
十執幡蓋擁一尼童入門譁傳曰啞啞啞開驚顧  
女索紙筆書偈云大地山河是阿誰了無一法可

思惟夜來處處鳴鍾鼓敲破髑髏人不知又云須  
彌山上擺鐸大洋海底搖鈴若問啞女姓字只此  
便是真名擲筆徑去開復追問小兒啞女何人曰  
維衛佛也又問兒等何人曰問取啞女忽俱不見  
元無爲子姓張氏諱悌字信甫居鄞之象山有別  
業在鄞城扁舟往來傲兀煙浪自視如鴟夷子皮  
然好結賓客肴觴左右具捐所有予人無吝色父  
嘗以門戶微罪當逮詣吏無爲子奮而請曰父老  
願以身代雖萬罪不辭父藉以免奉親能備孝養



而身與妻子衣麤食糲而已象山中大瀛海間多  
陶隱君司馬練師之遺跡無爲子早從方士習聞  
長生久視之說旣壯出遊南粵北燕回薄萬里愛  
武當神明之奧鍊形服氣莫此爲宜歸常語妻子  
而妻子固不信也一日大會親舊曰吾當去此隱  
矣衆爭止之佯應曰諾詰旦引刀截髮解故衣被  
布衲偪屨著行滕佩鉢囊掉臂出門徑去顧語其  
冢子古初曰善事爾母教育諸弟無以我爲念也  
行至武當山止紫霄宮師事宮主張真人願執弟  
子役真人啓之道要署爲首衆無爲子晝則服勞  
薪水與衆同甘苦滋味取其至薄者夜則危坐一  
榻脇不至席者二年忽晨起別衆衆方怪之則旣  
化矣

陶隱君習學玄教初司馬鍊師居天台嘗自題其  
宴休之所曰澄碧而大瀛海者陶隱君丹竈故處  
也隱君旣得度於崇道觀而受上清法錄於華陽  
宗壇至是因取鍊師舊題以名其堂隱君始築室  
華陽尋變姓名至永嘉楠溪青嶂山泛海詣霍山



經年還木溜嶼受戒於鄧縣阿育王山其道院在象山縣爵溪之陽與阿育王相望

覺慶鄞人姓毛氏號曰壽堂弱歲禮壽梅峯落髮師化道俗甃石衢鑿義井施湯茗行鍼藥凡可以澤物者靡不爲至正辛巳杖錫至雲間觀普照佛會隆盛遂預作別四明及杭之麴院道友二書并偈云無量劫來元有我無有有我我亦無無我無人無覓處蕩蕩光明耀太虛復示衆云興來立到五更後徹骨寒來有幾人已而寂三日茶毗於西

延恩徧體汗下迎歸是夕紅光燭天又十日顏貌如生鬚髮自長人皆嘆異

振藏主性慧居城西海會寺一日往定海見主家火起遂以杖指之乃返風而滅

慈谿

唐惟實姓湯氏別號徹杭之富春人四歲不語父喪忽謂母曰生鞠德重愿歸佛圖以報於是出家從本宗禪師密授微旨天寶中振錫於大蓬山麓廣德二年徙香山寺貞元二年坐逝建塔於寺巽



隅墓焉咸通十四年忽逢人負漆器五百事入寺  
曰湯和尚於浙西勾緣先遣至此衆問其所在曰  
溪邊濯足衆趨而出惟見濡跡草徑直掘墳塔遺  
履在傍遂啓塔視之儼坐如生髮鬢秀長遂出而  
奉之

遂端姓張氏投師德潤寺日誦法華經至老不懈  
咸通十二年跌坐而化須臾口出青蓮華七朶芬  
芳異常窆東山之下二十餘年塚屢發光衆開視  
之形質如生遂迎還寺漆飾奉之號青蓮法華尊

者

五代圓遠戒行清苦定明慧融吳越寶正丁卯創  
菴于蓀湖講演經教聲浹海隅及示寂舌生蓮花  
窆于寺南

師嘗有戒行結屋花嶼嘗有白龍聽經因名白龍  
院祈雨必奉其繪質以禱之輒應

宋王闕自號無功叟家世名儒舉進士不得志布  
衣蔬食徧詢講席凡禪林宗旨天台教門無不洞  
達晚年迷淨土自信錄以明三身四土之旨紹興



十六年四月丁卯之夕忽聞異香滿室乃沐浴更衣面南趺坐而化焚其軀得舍利如菽者一百八粒

李至能唐天寶二年敕建大寶觀於永昌潭上至宋大中祥符間至能有道術書符呪水檄召神將輒至一日至能出其徒盜其符呪水焚檄爲戲神將羣集於庭無以號令遽云此地卑濕爾等爲我移之須臾忽大風雨發屋拔木運屋於溪南高爽之處號曰神運殿治平二年賜神運至道額

則全字叔平姓施氏落髮於邑之保國寺南湖競推十六大弟子則全首冠焉旁通書史尤善著述性直氣剛敢言人失人以是重之住三學三十年郡守郎簡尤禮之嘗謂人曰叔平才氣凜凜然若儒冠使職諫諍豈下漢汲黯唐魏徵我朝王元之邪慶曆五年夏別衆坐亡世號三學法師

妙源字晉之清苦峭厲貌寢薄嘗衣蘆花衣服鐵械口誦佛號不輟每跣足乞食于道得法於智愚愚晚歲在徑山源演法代其酬荅從者如林方其



機峻電疾卒不可搏縛風止水靜意泊如也主定水問學滿戶外後示寂願以身飼烏鳶善爲唐詩人傳誦之

元曇噩字夢堂慈谿王氏子世業儒生而魁岸風神洞爽卅歲即通經史尤贍於詞章鄉先生強之舉進士不甘於聲利棄去初依奉化長蘆寺後住天台國寧寺及象之瑞龍寺老而戒行嚴潔文章簡古士夫有丐其文者不稿而成大明洪武二年以高僧召至與蔣山寺楚石禪師等說法已而歸

瑞龍東堂居鐘樓之側一夕颶風猛作鐘樓廊廡俱什衆謂師必不救往視之師乃危坐其中惟一巨木斜支臥榻人以爲異六年六月忽沐浴更衣請衆敘平生乃作偈曰塊然一物或有或無翻身歸去踏破毘盧端坐合掌而寂集梁唐宋高僧傳若干卷行于世

國朝祖闡字仲猷姓陳氏祝髮於邑之永樂寺年十八機鋒峭峻負出流輩洪武四年主郡天寧席詔取天下高僧闡與焉尋奉使日本歸一日郡僧



怨中訪之及別闡笑曰可遲一日送我明日果合掌而逝

大始字宗元族胡氏性警敏敦厚道振風植受業于永明寺所誦經典無不貫徹尤善詩文洪武十五年詔取天下高僧邑令馬雄舉之尋授僧會司僧會

一覺字性原姓曹氏祝髮於永明寺精修力踐刺血寫華嚴八十一卷善吟有寒泓稿嘗與邑太子正字桂彥良遊一日彥良侍上文華殿問在鄉里

時與誰遊以僧覺對因誦贈覺詩上稱善翌日賜和御製詩上人侶影處幽林紫竹寒潭映水森草舍半間雲外月松窻一榻谷中心玄談靜夜風生石頂禮清晨鍾撞金有客扣禪曾問道昂昂寂寂悟機深命考功監丞徐瑛錄示彥良賜老歸里復與性原遊遂敷宣 聖意書御製詩歸之俾藏之

山中

如笈字性海姓余氏祝髮於定水寺禮復見心爲師戒行端謹通內外典善書能吟雅爲緇流推重



永樂中兩膺召命纂修內典嘗住撫州之翠雲及奉化岳林二寺有翠雲稿歸永明終焉

園詮字象外姓楊氏祝髮于永明寺宿性穎敏諳內外典章端戒清謹爲僧中柱石善吟有月航稿存寺有偈贊頂相曰坐脫立亡未爲奇特吾佛世尊臥而有側山僧總不隨他一旦西方日出

弘闡字大猷姓陳氏祝髮於永明精藍恪守戒律綽有僧行博通古今作詩清麗飄逸不塵字亦結體精密有晉人風度甚爲儒林所推重

奉化

唐葉靜能有道術嘗講經虛白觀忽南海龍化一髯叟聽講罷訴曰胡僧呪力甚大欲喝海竭語甚哀切靜能乃書朱墨符遣門人持往海上救之海水復還龍獲無恙初觀在原上無井汲引遠甚一夕龍於觀左穿一渠泉流不絕遂成大溪因號靜能曰仙師溪名曰龍溪

五代布袋和尚名契此形裁腰脰蹙額瞠腹常以杖荷一布袋凡供身之具盡貯袋中入市見物則



乞時號長汀子雪中體不濡示人禍福輒應天將  
雨即着濕草履途中驟行遇亢陽即曳高齒木屐  
市橋上豎膝而眠一日以蒿草散植民田中未幾  
錢氏增丁稅民亡田荒梁貞明三年丙子三月於  
岳林寺東廊石上端坐而逝岳林遂爲布袋道場  
後有二僧至寺云從天台見之衆不敢信發塚視  
之乃空龕也得青甕淨瓶六環錫杖縣令莆田王  
仁佶先遇於江南天興寺宛若舊識後於福州官  
舍復見之懷中出一圓封授王曰七日不至則開  
踰期發之乃偈也曰彌勒真彌勒化身千百億時  
時示世人世人俱不識王令至縣乃記其事併刻  
其偈于碑崇寧中賜號定應大師閣曰崇寧令黃  
特銘其墓

蔣宗霸周顯德初人爲人慈善溫謹口誦摩訶鄉  
人稱之曰蔣摩訶時岳林有布袋和尚摩訶心異  
之與之處逾三年一日同浴長汀摩訶視布袋背  
有目布袋曰吾爲汝所窺當去矣吾以布袋贈汝  
俾子代代爲衣冠家布袋歸岳林坐逝葬封山後



寧波府志卷四十一  
越帥遣介過蜀遇布袋道中卒舊遊四明識之乃  
曰爲吾謝摩訶相見已近願自愛卒歸至岳林以  
語摩訶摩訶曰吾已知之一日造城別親友以逝  
智覺名延壽錢塘王氏子周廣順二年居雪竇寺  
吳越錢氏崇信之所著宗鏡錄一百卷

宋耕號雪溪先生世家雙流遷崇慶宋紹興中  
爲閩中令以仙去後其孫德之聞在四明往訪焉  
至雪竇山有蜀僧言聞諸耆老云山後爛平山有  
二居士其一宋宣教也德之躋攀至爛平果見丹

竈而仙蹤不可復尋矣乃置祠其上而歸樓宣獻  
公鑰爲賦騷詞以招之國學博士楊琛爲之記

圓照名梵光奉化楊氏子也道行高潔宋政和四  
年太守呂公滂請主延慶寓福勝太守仇公念再  
迎歸還席歸老擇陽之悟真與發運使陸寘爲方  
外交以後事託焉沐浴更衣跣趺而逝河涇銘其  
墓

元衣和菴主一名知和蘇州崑山人隱居雪竇山  
畜二虎馴伏妙高峯千丈巖藤龕棲雲菴皆其跡



也後徙二靈山終焉大德丁未菴爲盜燬後虎乳其墟爲人害咸謂菴復則虎息至元丙子復其菴肖其像虎不爲害

國朝文沼字天鏡號粟菴慈谿孫氏子讀書明理究本宗三昧戒行精專人有過若不聞有善則樂道之洪武中興北山寺永樂初以高僧取赴京校正經典預龍華大會永樂七年仍歸北山一時文儒碩彥會集成社一日忽告其徒辰省曰吾今與汝訣沐浴更衣口誦法華經趺坐而逝

定海

唐惠超唐開元間居九峯山香栢巖草衣木食戒行精苦至宋咸平有真大悲者繼之善誦神呪鄉民歸敬縣尉丁漸爲舍基請居於山麓慶曆改元文珍嗣其業丁縣尉因改爲院治平元年賜額吉祥寺

元陳可復號雷谷定海人其師與真幼歲居杭入禁中精齋醮儀可復幼疎爽越有林生善役雷恣酒自許有問其法輒斥去可復晝夜承事林嗜酒



每鬻衣以奉繇是卒得其術至元中鄉大旱禱檜  
莫應有戲之曰陳道士能召雷命至官達將候其  
不驗侮辱之可復以法興雲須臾雷電大作雨甚  
嘗主教鄞之玄妙觀時值中秋有方士寓觀賞月  
可復不預戲以墨水噀符頃即烏雲掩月而雨黑  
雨坐客驚散衣盡緇矣衆知其所爲延之入席雲  
霧盡散月復朗然其響應神速皆此類也既而名  
聞京師召爲承應法師世祖偉其貌命治足疾可  
復曰疾深不可除臣有禁架術願試之試良愈復

命止風風返却祈雪雪立至從上巡幸幾十年卒  
京師追封爲誠明翊教太極真人

王天助字致和定海之蓬萊鄉人學道于袁松溪  
至元間大旱書符呪之雨輒應聞于朝賜號太虛  
玄靜明妙真人

### 象山

宋謝寶烏巖村人父宗立母董氏無嗣禱于真武  
夢雷震而乳次年生寶有金光燭室之異年數歲  
即有靈異嘗夢真武爲之浣腸溪上水至今有赤



色天旱與羣兒束芻龍祈雨雨即至舉芻龍放溪  
上即行數里觸石而沒遂成深潭每陰雨龍必見  
見之者必病人以爲患寶即去與人業田所芸處  
嘗有雲氣覆其上嘗得小魚變成小龍寶即跨之  
遊水中逮出而衣不濡邑嘗大旱令使祈雨密囑  
母擊簸箕旋紡車洒水母如其言而忘洒水則有  
雷而無雨後歸訪其母乃如囑爲之雨遂沾足元  
祐間事聞於朝旌以金帛皆不受惟求東攝潭居  
焉後多顯跡人稱活神建炎三年三月召隣里故  
舊曰吾明日辭世還造化三年後當復生幸勿葬  
次日午瞑目而逝越三年忽聞棺內有聲啓視之  
容貌如生忽見火從頂出化焉

**元鍾道士**失其名有法術歲嘗大旱書符呪之雨  
輒應時以天下方亂妖邪並興道士禁之即息呼  
召神將嘗使二童持劍入水斬鬼物持其首而出  
復多戲術人至今皆能道之

**國朝****梵琦**字楚石性穎異博通內外典元泰定中  
住海寧福臻院本朝洪武初以高僧召至京親承



顧問卒太史宋濂撰塔銘

法衡字允平徐氏子自元時年十一由白巖智門寺祝髮博覽經教主寺慧和尚令掌庫事固辭乃於寺南松林結菴以居其尚清苦習禪定能以善導人人咸禮之大明洪武十年鄞碩儒單仲友以使事止僧舍因問如何是芥子納須彌衡遽荅曰先生讀五車書今安在何處單駭而敬之遂著名湖海主寺者置之首座忽微疾即沐浴更衣請衆辭謝危坐而寂闇維之後於灰爐中得堅固子光

明瑩徹狀如冰雪人皆嘆異

潘頭陀年二十好屠宰一旦悔悟改行從善棄家入天台浪遊湖海得道而歸居等慈寺說法從者甚衆一日縱步出行有一老嫗浣衣溪上見頭陀來諦視良久乃曰此非昔日潘屠邪潘俛首作偈曰人說歸家好歸家心不寧溪邊老婆子猶說舊時名乃負父母棺歸山中合掌誦經忽火起與之同化後數年有人見頭陀於他方者  
司馬氏曰神仙釋老事多不經往牒所傳聞見互



異大都不可以爲訓然存而不削非語怪也高厚  
之中何所不有變幻冥昧博物君子不廢焉若一  
切擯而不存亦非所以語通方探物蹟也故甘陵  
甘始廬江左慈陽城郗儉事種種史策矍然可觀  
記何邪吾明劉綱鮑蓋朱棣及本惠啞女布袋諸  
狀尤奇詭可駭餘雖纖巨不倫要皆稟奇詭之氣  
昭靈秘於一方所當存而不議者也

### 存疑

司馬氏曰易世改物陵谷變遷載籍所傳甲乙互  
異郢書燕說之誤大都益種種也余纂輯郡乘窮  
搜極采頗謂已無漏事而稗官野史間多齟齬歷  
禩既遐則將于何取衷哉於乎非茂先之博物學  
辨痴龍乏子雲之多聞漫談奇字余蓋自知其不  
量矣乃復摭數事存之卷末以附傳疑之義云  
甬東即越王欲居吳王之地杜預曰句章縣東海  
外洲是其處又曰遷吳王句甬東註曰句即句章



甬即甬東史記越滅吳請使吳王居甬東吳語云甬東舊郡在句章東海外洲韋昭曰句章東澹口外洲澹口今之澹港也按輿地廣記定海有大澹港即晉劉裕與孫恩戰退還處外洲今之舟山舊為翁山縣世傳徐偃王所居春秋所謂甬東者即此古有甬東市定海亦有甬東橋今郡城東廂有甬東隅甬東書院甬東巡司意立郡時皆因春秋甬東字而名之者大江曰鄞江亦曰甬江槩稱之也按甬義甬猶湧水騰波也詩曰百川沸騰水上

騰也據舊昌國縣東灌門下註云海中有砥柱屹立中流望之若人作拱狀水滙此旋湧若沸凡舟行經此必先投物以殺其勢風雨將作有聲如雷舟人皆收山櫓港謂之走颶故郡因之以名理或

然也

句章春秋有句章昧封于此地故名

古鄞城太平寰宇記云本漢縣廢城陸雲集云昔始皇南巡會稽留鄞縣三十餘日因境有赤堇山加邑為鄞山在今白杜里產赤堇草故名堇烏喙也薛燭曰歐冶子與越王鑄劍破赤堇之山而出



錫卽此地蓋鄞本越之東鄙也會稽志云在會稽縣東三十里則謬矣惟新莽改鄞爲葦夏時鄞爲葦子國故爾今白杜有鄞城山遺蹟尚在

古鄞城相傳在賀山橋非也乃在賀山在東錢湖之東故其時名湖爲西湖若在賀山橋卽當云東湖矣何得謂之西耶詳見同谷山及東錢湖下近生員丘緒盧叔麟沈明臣偕往審之遺蹟種種及登鄞山橋所稱故城者掘土驗之皆浮土絕無瓦甃磚石之類則非城趾可知後人因其土隆起若

城趾故云爾

官奴城卽古鄞城也太平寰宇記與舊圖經皆云漢光武事見古蹟志又十道四蕃志云宋武微時辟吏於此與人奴名桂者善因匿之爲吏所窘奴乃畊于田以土覆武免後立官奴城以報之掘土築城處名官奴池其謂光武者於史無所據今按宋書孫恩寇上虞時劉裕戍句章疑爲宋武云丹山赤水洞天福地記云四明山乃丹山赤水之洞天係三十六洞天之第九洞高一萬三千丈周



迴八百里環二百七十二峯列二百七十二福地  
其巔五峯絕高形如芙蓉東接句章西連禹窟南  
嗣天台北包翠碣上有方石四面如窻中通日月  
星辰之光故曰石窻又曰四明又有石樓石鼓石  
筍之奇接奉化小冊山在四明山南下有洞若廣  
廈遺冊霞二篆如朱書內有小穴深甚行幾半日  
聞水聲如雷殷殷巖罅水流皆赤色此正冊山赤  
水也形勢蜿蜒連亘明越二郡又有響壘瀑布仙  
人足跡一洞不知其處路通方丈蓬萊封禪書方

丈蓬萊瀛海三仙山也以金銀為宮闕望之如雲  
東方朔十洲記在東渤海中唐沈紳詩三山對峙  
海中央孫綽天台賦涉海則有方丈蓬萊登陸則  
有四明天台方輿勝覽翁洲東北有蓬萊山四面  
大洋世傳徐福求仙至此有石枰脩竹蒼翠一塵  
不到即郡志所謂東霍山者象山西南亦有蓬萊  
山梁陶和景煉冊處又名煉冊山有峯如掌名仙  
人岩有井曰赤水泉是又以是為冊山赤水又四  
明圖經奉化有蓬萊山納土為貢以實方丘云



黃延塘黃晟築奉化志訛延爲賢或云黃甘里  
舊圖經云徐偃王墓在翁洲王龜齡會稽賦云翁  
洲訪偃王之廬是也一云在鄞隱學山

會稽太守王景興問士於虞翻翻對曰鄞大里黃  
公潔已暴秦之世高祖即祚不能一致惠帝恭讓  
出則濟難會稽續志云黃公之賢列於四皓在秦  
漢時乃里人也晉夏統言會稽土地風俗其人循  
循然猶有黃公之高節王元之在汝州有詩云未  
必頸如樗里子也應頭似夏黃公畢文簡譏之以

謂不當云夏黃公杜子美詩云黃綺終辭漢王逸  
少有尚想黃綺帖陶淵明詩云黃綺之商山南史  
阮孝緒云漢道方盛黃綺無間山林是皆以黃爲  
姓矣王貢傳序四皓名字當讀爲綺里季夏而後  
人誤讀爲夏黃公者亦猶樂正裘牧仲之誤耳袁  
正獻之父作甕牖間評云今王姆乃黃墓也舊傳  
爲秦世黃公墓云又曰黃姑林即黃公林也輿地  
志云鄞有大里夏里黃公所居按今鄞無大里亦  
無夏里今有仲夏亦傳爲夏黃公所居云史記留



侯傳註陳留志云公姓崔名廣字少通齊人隱居  
夏里故號黃公或云先有崔姓者作家乘故撰黃  
為崔以誣祖之豐南禺道生亦云公姓崔名廣下  
黃人也故號下黃公古有內黃外黃上黃下黃皆  
趙魏地見應劭東觀漢記黃伯思東觀餘論云奉  
化志謂為奉人定海志謂為定人俱非定志以舟  
山有黃公墓故云然黃公者乃後漢道士赤刀厭  
虎為虎所食者非四皓之黃公也  
賀知章按舊唐書與會稽志俱為越州永興人考

永興乃今蕭山縣古今之志四明者並載之非以  
其自號四明狂客故耶四明山在會稽跨寧紹之  
境不專屬鄞今郡城中月湖上有賀監祠故傳為  
賀監讀書處鄞之句章鄉小溪有馬湖云賀氏洗  
馬池相距三里有賀家灣至今賀姓者尤多又掘  
土得斷碑有會稽郡賀府君六字者老皆謂賀監  
故宅始寔居此後徙剡川然剡乃嵊縣地寔與奉  
化接壤奉亦有剡溪我明郡水源皆自剡也况馬  
湖又與奉連壤地而賀監子曾子故為會稽郡司



馬六字碑豈其墓碣耶是皆不可考然賀監舍宅  
爲觀名千秋考會稽志今天長觀是也云去府東  
南十二里又請周官湖爲放生池一曰永周湖今  
池去府東南十里史浩爲安撫使又于其地爲亭  
名懷賀種種古蹟遺翰如知章三告龍瑞宮記等  
多在山會間其墓在山陰縣東南九里其地因名  
九里墓在山巔鄉人呼爲賀墓其爲越人明矣  
舊志載徐浩今削不書以其黨元載也浩字季海  
居越中爲中書舍人知制誥乾元二年進廣孝經

十卷授校書郎累官至嶺南節度使黨元載爲吏  
部侍郎御史大夫李迺筠劾奏貶明州別駕遂居  
鄞善書法著書譜及古蹟記各一卷崔殷作董孝  
子廟碑浩手書及李陽冰篆額當時稱爲三絕今  
毀不傳浩自稱四明山人見唐藝文志

柳耆卿名永崇安人以字行景祐間登第累官屯  
田郎嘗監定海曉峯鹽場登足羨贏以最聞有長  
短句名留客住詞刻石屏中在官設酒樓會外邦  
朝貢之士與之酣歌若江北岸之花柳巷管絃樓



皆其所素游地故又有玩江樓詞為人脫灑善詞  
章著有柳七官詞行世及卒諸妓合金葬之舊志  
見名宦傳今以政無可稱行復不檢故削之

船場景迂先生祠乃故宋侍讀晁以道說之廟以  
道以元符上書黨人監明州造船場其易玄星紀  
譜皆作於是後立祠祀之陸務觀作記因兵火毀  
石後世不識通番之故乃呼船場爲戰場下番灘  
爲瓦引灘景迂祠爲邊江侯廟今人則又訛爲邊  
家樓廟桃花渡有溥濟菴寺灣有官寺有超然亭  
皆以道作元名江下寺今廢爲屯種市船舶廠即  
其故地

方國珍事詳遺事志中嘗所見傳記種種皆云國  
珍兄弟殺其田主而醢之官司捕不服遂殺捕官  
入海爲亂今查郎瑛七修類藁云至正八年蔡亂  
頭剽劫海商方乃爲國宣力勦賊而總管焦鼎納  
蔡之賂反黜其功方忿曰蔡能亂我不能耶遂與  
弟國璋等叛學士姚涑作傳亦云台人李大翁嘯  
衆亂海上掠漕舟殺使者時承平日久有司駭愕



莫能捕因倡招安之策劇盜蔡亂頭聞之嗾官兵  
不足畏効尤為亂勢鳴張甚海濱子女為所掠殆  
盡至正八年叅政朶兒只班發兵捕之懸賞格募  
衆國珎應募有功台州總管焦鼎受蔡賂薄其罪  
不誅國珎心不平八月國珎怨家誣其與蔡通逮  
捕甚急傾貲賂吏不得釋國珎無以自白聚家衆  
謀叛衆共贊之遂入海為亂與郎瑛言相類要之  
國珎叛賊恐非起於報效所稱殺田主事亦非無  
根此在黃巖必有得其真者

相傳有陳忠者字希中一日思中鄞人中洪武甲  
戌張信榜第二官至太子賓客修 高皇帝實錄  
與黃子澄方老孺戴德彛皆為副總裁建文壬午  
坐黃黨族誅今府前清軍館其家故址按革朝遺  
忠錄有數本子所見者俱不載忠事及考 皇明  
進士登科考張信榜第二人乃耿清而第三則德  
彛至永樂甲辰科始有鄞人陳中乃第二甲進士  
又不當與壬午之難而洪武辛未科許觀榜自第  
二張顯宗後皆缺丁丑科陳郊榜亦皆缺據田汝



成序登科考云洪武永樂之間 國家多故百官  
以誑誤觸法者往往連坐斥戮削籍仆碑以昭大  
戒示不齒故試錄雖有部本而殘缺失次忠之有  
無或以他科誤爲甲戌皆不可考矣閩人鄭應旆  
作革除錄云忠爲甲戌張信榜第二及作清傳亦  
書甲戌第二不應自相矛盾也信定人德彛奉人  
忠鄞人三人同郡若果一時及第又同死國事誠  
可異矣顧未得其真耳楊寔志科第考乃以葉宗  
可爲信榜第三而列德彛於應承完之後繆又甚  
矣是年登科者無葉宗可

唐代宗大曆六年海寇袁晁據翁鄞二縣德宗貞  
元十四年明州將栗鏗殺刺史盧雲反懿宗咸通  
元年賊帥袁甫陷象山僖宗乾符二年鎮遏使王  
郢陷明州六年黃巢掠明州中和元年鄞城李季  
友陷明州光啓二年鎮將董昌寇明州王深寧困  
學記聞不載袁甫黃巢董昌之亂俱云昭宗景福  
元年明州將黃晟自稱刺史云



寧波府志卷四十一終

督工寧波府吏王銳

洪傑

劉大光



